


昌邑縣志

貞



DS
793
S42
C4853
1742
v.4

v.4



昌邑縣志卷之七

知昌邑縣事周來邵浴齋氏輯

坊表

鄆城坊表之建幾埒州郡余維其義蓋深以遠
也夫造物靈秀之氣鍾諸人爲科第爲名臣爲
孝子爲貞烈蔚爲物望詎非群倫所宜景行哉
顧當時則傳沒則已焉有求流風遺韻而不可
得者芳躅隱矣儔則溯廻從之自坊表立前溯
有明茲逮非國朝幾四百餘年而昔賢昔哲猶

令人瞻仰徘徊想見其為人慨然興追踪熒美
之思大哉坊乎將後之視今不猶今之視昔歟
非深識表揚風勵之義者不足語此

關西夫子坊 在祠東久廢

東街坊 凡十六今存十

亞魁坊 嘉靖二十八年知縣張士奇為癸卯科舉人邢瓚立

贈監察御史 嘉靖二十八年巡按党承賜為邢尚簡父時舉立

柱史坊 嘉靖二十八年巡按黃綬為巡按甘肅御史邢尚簡立

內臺總憲 嘉靖三十九年巡按段顓言為都察院右僉都御史邢尚簡立

進士第嘉靖四年巡按張英為辛未科進士李鳳

賜進士第嘉靖三十九年巡撫丁以忠為辛丑科進士邢尚簡立

贈九江知府萬一十四年巡撫馮嘉會為邢有忤文尚寬立

賜進士第嘉靖十一年巡撫陳鳳梧為甲戌科進士翟瓚立

封給事中嘉靖十一年巡撫陳鳳梧為翟瓚父淳主

都憲巡察海道副使吳道南為巡撫其肅副都御史馮續立

進士坊嘉靖十七年知縣吳惠為甲申科進士馮續重修今廢

諫議坊巡撫胡纘宗為工科給事中翟瓚立今廢

都憲坊巡撫蔡經為巡撫湖廣副都御史翟瓚立今廢

贈都御史坊 嘉靖十七年巡撫蔡經為翟璵父淳
立今廢

贈知縣坊 巡按陳九疇為宋子質父世美立今廢

世科坊 治十八年萊州府知府李榮為成午科
舉人孫楷立今廢石柱猶存

南關坊 凡十四今存七

進士坊 嘉靖十一年巡按廖自顯為辛巳科進士
孫昂立

兄弟繡衣 嘉靖四十一年巡按劉存義為河南道
監察御史孫夢豸立

太保忠宣坊 成化十年巡按翁世資為戶部尚書
贈太保黃福立

提督六關坊 嘉靖四十年巡撫丁以忠為巡撫山
西副都御史葛縉立

雙桂坊 嘉靖四十八年巡按張鵬為己酉科舉人
葛縉立

賜進士第

嘉靖壬寅巡按張鵬為乙未科進士葛

誥封監察御史

為孫夢麟孫夢豸父義立今廢

員外坊

為戶部員外郎孫許立今廢

舉人坊

成化十一年知縣陳文為甲午科舉人姜鏗立今廢

總督三鎮

巡撫朱衡為總督宣大都御史葛縉立今廢

侍郎都憲

隆慶元年巡撫韓君思為兵部左侍郎葛縉立今廢

封主事坊

嘉靖四十五年巡撫霍冀為葛縉父慶立今廢

貞節坊

為王鶴鳴妻朱氏立今廢

西街坊

凡二今存一

坊表

贈主事坊 嘉靖十一年為孫昂父植立

貞節坊 為生員孫評妻宋氏立今廢

北街坊 元四今存二

三世春曹 嘉靖年為禮部郎中孫恕孫洪禮部員外郎孫昂立內刻六朝封誥

進士坊 成化二十三年知縣丁倫為景泰甲戌科進士孫洪重修

都憲坊 治年為副都御史孫洪立今廢址存

搏天三鳳 天啟元年為辛酉科舉人李治躬立揚名史欽明立今廢

城外坊

貞壽坊 任南關為梁若魯母褚氏立

真壽坊 在辛郭為劉讓母宋氏立

節孝坊 在黑埠為貢生黃德祥妻郝氏立

節孝坊 在白衣廟為張泰妻柳氏立

旌善坊 在郭上 在南店為新阡社貢生邵美

菱墓 叙坎俱按世代

聖賢樹立宏達名與天壤相敝則不以存亡為

顯晦彼墳逼荆將塚迤要離猶足由其靈爽動

人畏慕矧行義卓卓者乎後之人挹芳躅於下

齡弔荒榛之片隴永嘗不流連慨歎想見其為

人昔中郎作墓碑惟郭有道爲無愧則悽愴松
城摩挲翁仲於其人果有加乎彼自有口而不
亡者也古人云君子貴三不朽良有以也

逢刃父墳

在縣南五里世傳丑
父食邑都昌葬此

更司

王塚

在縣西三十五里與福
社故老相傳今不可考

彭善土塚

在縣東十五里密城社主人云漢梁王
彭越墓也嘉靖中澠水齧其址下視惟

龍津

一首骨其大如斗按彭越昌邑人其地
不漢山陽郡治高祖旣醢越梟其首于洛

陽

陽謂塚今在昌
邑恐涉傳會

宮世昌墓

在縣東
五里

黃

福墓

在縣西三里新郭正統五年勅賜祭葬有大學士楊士奇碑記

王

貫墓

在縣西三里

王

璉墓

在縣南三里

李夢白墓

在縣西南十五里

孫思恭墓

在縣西北五里道昭

孫恕墓

在縣西南三里

魏清墓

在縣北三十五里

譚溥墓

在縣東三里

孫祥墓

在縣西南三里勅賜祭葬有劉珣碑記

孫洪墓 在縣西三里勅賜
祭葬有徐溥碑記

姜鏜墓 在縣南
三里

邢瓘墓 在縣西
一里

邢尚簡墓 在縣西一里
勅賜祭葬

孫植墓 在縣西
南三里

馮續墓 在縣東南
三十里

孫鑑墓 在縣南
三里

朱璉墓 在縣東
二里

孫昂墓 在縣西
南二里

王世臣墓

在縣東一里

葛縉墓

在縣西二里

孫夢豸墓

在縣西三里

楊自然墓

在縣東南五十里孟任社

翟瓚墓

在縣東二里

李鳳墓

在縣西南三里

史載勳墓

在清石山東麓

孫架墓

在縣西南二里

李治躬墓

在縣東二里東山麓

夏揚名墓

在縣東南二十里

張志棟墓

在縣西南二十里鳳凰埠

寺觀

自二氏演教而琳宮紺宇徧乎方州矣羽流禰
子汨靈鷲之微波耳空同之餘訣張皇金碧惑
世誣民旣已淪肌而沉髓雖欲揭赤幟澆邪焰
莫不星輝輓撲而燎原隨之可勝慨哉昌以屏
邑鹿園鶴觀焜耀於數百年者幾閱盛衰而規
恢不改其他窮鄉僻社一土一木之建無足紀

述者難更僕數也

崇聖教寺

在縣治東創于宋毀于元重建于明洪武二十四年為叢林正統五年僧會善

邨重修萬

六年邑人兵部侍郎葛縉捐貲增

修門廂殿閣廂寮厨庫致十餘間為一邑名利

國朝乾隆元年邑人邢

部郎中姜煌重修鬱瓊樓

崇福講寺

在縣南新營社元至元二十八年任持僧曹道瑞修明洪武十五年重修

大悲禪寺

在縣東南辛興社創始甚久明洪武二十八年僧禪忠重修

寶林寺

在縣東南北孟社明洪武十八年僧智文修二十五年併入崇聖寺

慶壽院

在縣西北太寧社明初僧行仙建

觀音院

在縣西北太寧社明初僧守祚建國朝康熙十九年邑庠生魏忠捐貲重修雍

正六年監生
魏學書重修

龍興院

在縣東北膠昌社
明初僧會譚建

慈雲院

在縣東北徐福社
明初僧孫和建

青龍院

在縣北殷海社
明初僧道聚建

興福院

在縣東古城社
明初僧勝濰建

興善院

在縣西北白塔社
明初建
國朝乾隆五年戒僧祥泉重修

崇興院

在縣北青阜社
明時建
國朝雍正間重修

彌樓禪院

在縣南王可社
明萬四十六年僧海
國朝雍正十二年僧普長重修

旃檀庵

在縣南王可社
明萬四十六年僧海
國朝雍正十二年僧普長重修

觀音寺

在縣南金家口康熙五年建二十九

佛像乾隆二年邑人

示部郎中姜焯重修

玉真宮

在縣西北一里金太和八年道人徐志篤傳道微建玉真觀貞祐二年毀於兵燹乙

卯燦然子楊明達高弟李志潛復建甲寅稱玉

耳宮明洪武十五年重修永樂十五年道會王

志直復修萬三十八年復修國

朝康熙四十六年知縣邵瑄重修

王母宮

在城西北國朝康熙十六年知縣沈一龍重修

紫微宮

在縣南新營社久廢

延真宮

在縣東北十莊社久廢

碧霞宮

在西岩邑人御史孫夢豸重修

三元宮

在縣西南小店邑人兵部侍郎葛縉重修

栖直觀

在縣治東元至元三年道人孫守質建

珠觀

在縣東徐福社久廢

延直觀

在縣治南今關帝廟即其故址

修直觀

在縣東古城社

太虛觀

在縣南官莊社久廢

集仙觀

在縣南新伏社久廢

稅仙館

在青石山前邑舉人史載勳建

仙釋

佛老之惑人久矣汨浪頽波者殆二千載首其
教必謝去人倫以遊無何而歸極樂非所謂捕
影捉風者耶至其井枯泊逃虛空丹授黃庭行
參白業視溺首浮塵者較多焉行修之子卓邁
恒流亦或數百年而一遇其飛遁緣覺之迹不
得沒也故志之

李願直

邑人金武畧將軍家清石山之陽地多長
松古柏高下隱顯林巒絕勝願直旣退老

養恬守素名其園曰歲寒菴曰守休仙人劉長
生過之以瓜殼題石曰遇仙園願直後遂得仙
術焉

密菴大師

邑西鄉忠民里姚氏子也生而穎慧年十九爲膠東萬象師弟子法名性顯閱

三載入五臺舊額龍泉寺叅澄方師久之律行精持澄公遂授以衣鉢詔賜紫衣袈裟號皇壇法師後東歸卓錫辛置額其菴曰旃檀結趺焚修大暢宗旨坐道場二十餘所弟子徧燕雲齊晉間康熙丙午四月二十九日示微疾諸檀那來問之密公煎茶叙別畢從容端坐說偈曰七

十老僧打破虛空這個坐化本來那僧非凡一度十萬餘程後語不真遂化去

祥異

五行之精各有所屬其發爲吉凶怪變每附人事之得失而各以類見至術家者流因備著其事應其或不應乃陰陽剛柔之不齊不可臆揣

必遠逾遷就影響其說則謬矣春秋災祥必
蓋欲君子觀其譴告則知戒德慎行焉至符瑞
靈徵之見亦皆順承而孜孜不怠若必著其事
應則偶有不應者將幾幸而不懼非君子之用
心也一都一邑之祥妖所關甚微其於戒懼順
承一也故謹列其成迹而闕其徵應庶合春秋
之意云

漢

質帝本初元年五月海水溢北海溺殺人物

靈帝熹平二年六月東萊北海水溢出漂没人

物 光和六年冬大寒北海東萊井中冰厚尺

餘

南宋

武帝永初二年二月赤鳥見北海都昌

孝武帝孝建三年五月木連理生北海都昌

大明三年九月乙亥嘉禾生北海都昌

明帝泰始三年五月乙卯白麋見北海都昌

元

順帝至正七年二月昌邑地震

明

成化八年大饑人相食

治五年大旱

正德三年大饑

嘉靖十六年七月淫雨澼水潰溢突入城壞民

廬舍無算 十七年大饑民食草子多道殣

二十七年紫芝產新營李家園 四十三

年大蝗

隆慶二年麥兩岐有年 三年七月澼决漂沒

禾舍有蝗民大饑

萬 五年九月彗星見西方長甚三閱月乃滅

十一年冬十二月雷 十二年二月地大

震七月澼决 十六年六月地震 二十一

年四月大寒有凍死者秋大雨水傷禾八月

雨雹是年大饑 二十三年春大饑人相食

夏大疫九月天鼓鳴 二十五年八月地震

越三日又震 一十八年四月大風拔禾飄

瓦有巨石移於他所 三十八年六月初四
日濰決漂沒田禾壞城垣 四十一年七月
海溢漂沒人物田傷鴻鹵 四十三年蝗旱
來春大饑人相食婦女南販 四十五年大
蝗捕納三百石準充附生 四十六年八月
彗星見東南長甚三閱月乃滅
天啟元年十月地震

崇禎三年蝗 七年七月初五日濰決頽東門
十二年冬十月大雷 十四年正月二十三

日日四環交映有黑氣出日中
十六年三月朔柳墮雨血

大清

順治七年七月二十五日夜澼決漂沒田禾頽
東門九年五月二十三日澼決漂麥八十
六年七月十二日夜澼水大決灌城頽城垣
十四所土培南東二門關鄉廬舍漂沒秋禾
一空越十日大水復至訛言城欲陷沒人心
惶惑久之乃定十八年三月蝗生白塔瓦

城有鳥數萬啄食之秋大有年

康熙七年六月十七日戌時地大震聲如殷雷

城郭屋宇崩圯死傷甚衆城外地裂泉湧出

黃黑沙月色爲昏十八日又震七月十七日

八月十八日屢震十一年七月飛蝗爲災

冬饑十三年春蝗旱十六年七月十五

日濰決壞城垣九所漂沒禾舍二十六日水

復至頽東門十七年七月大雨膠濰二水

交龍鬪三十年六月蝗秋蝗又生來春饑

有流民 三十五年夏秋淫雨傷禾冬饑

三十八年三月初七日城隍廟災 四十二

年淫雨害稼 四十三年春大饑子女鬻販

人相食白骨枕籍大疫 四十五年大有年

四十八年蝗 五十五年縣衙災 五十

八年七月澼水東徙

雍正二年蝗 五年十月初三日海大溢溺殺

人物田傷瀉鹵 六年秋大有年禾多雙穗

八年六月大雨水二十五日夜澼水大決

浸城基者三版土培南東二門二十八日八
愈盛頽東門壞城垣四所民惶或夜奔十字
街久之乃定村舍漂淪民爭適高阜或棲木
上
不食者三日夜沙壓田數十頃來春饑

附兵燹

正德六年流賊劉六等寇昌邑知縣劉堅棄城
走

崇禎三年登撫孫元化遣孔有德等援陵河至
吳橋叛回戈東指十二月十二日過昌邑攻

陷登州四年二月圍萊肆殘暴八月十七日
總兵靳國臣等統關寧兵會勦戰沙河大敗
之萊園解追至登圖之賊殺人爲糧徹屋棟
作筏夜啟水門航海去

十五年十二月

大清兵圍昌邑十六日城破

十七年李自成僭號永昌土寇大起五月十三
日城陷劫掠無遺僞令曹養素逃出自縊土人
王嘉忠翟從諤李好賢等各爲雄長八月

大清定鼎好賢歸命佐平諸孽四境以寧

順治三年三月十五日劉大槐等乘夜入城殺
縣尹魏名大劫庫藏肆剽掠至辰巳時而去



昌邑縣志卷之八

知昌邑縣事周來邵浴齋氏輯

藝文

文章者不朽之絕業也極其致可以闡揚經傳
輔翼道真至標著述於蘭臺恢經濟於彤陛炳
若日星焉雕章琢句者流發抒胸臆涵泳風騷
亦不謬古之作者皆可垂諸鼎鐘刻之琬琰昌
雖文獻闕遺而名人偉士所作未嘗不沈雄高
雅焜燿一時也今第取其有關大義與切邑事

者著於編部外今茲邦北亦闢大義與

疏表

諫遊畋跡

明

翟

瓚

邑人

題爲自劾求退懲失職以悟聖心事臣惟今之所謂
給事中卽古所謂諫官傳所謂有言責者以諫爲名
誠宜奉職以言爲責不得則去故賈誼痛哭陽城裂
麻况臣謬荷聖恩濫官言路且時復多事正抗言致
身之秋臣非不欲靖騷亂之力以爲陛下用但遷者
諫諍塞門紀綱墜地固是日去善類自危臣或知之

而不敢言抑或言之而不見採抱羞忍恥日夜望陛下
下一旦悔悟則臣遇巷有期碎首不惜猶可爲陛下
之忠臣也故敢竊祿苟員以至今日不意陛下親信
非人底身不類江河之變去不可轉昨日北狩之行
幾爲宗社辱紫塞黃沙盤遊六月人怨天怒過不在
小時其未去臣雖嘗建一策而留法駕但感格之誠
未至而芻蕘之言竟不足以動聖人之聰明致使陛
下在聖母則久缺問侍之誠在后宮則久廢室家之
樂時享不禮于祖宗視牲代行于臣下聖節棄華夷

之賀頒一廢告廟之儀正且不視朝長至不傳制宗
室愆冊封之期是陛下不有其親也六軍蹈朔漠之
險是陛下不有其身也有此十失稔而不悛臣恐陛
下無以告天下示後世以自贖于天地祖宗也時其
旣去臣亦嘗有居庸之請但關隘阻絕臣不過望北
再拜稽首而追之咫尺天顏竟莫一見夫臣之事君
猶子之事父起居安危不可一日不知今者陛下未
去則不能留陛下已去則不能請則是如路人報之
者亦將焉用此臣臣之罪莫有大焉臣之去宜於此

時決之幸而天鑒聖衷不誤大祀臣意陛下此念可
回自今以始猶可爲陛下之忠臣也不意道路之聞
陛下復欲出遊東巡南巡非臣可知臣知此行必非
昔比昔日猶可言誤今日則成耽樂矣臣恐大駕一
出則肘腋或有窺伺之變王室或有問罪之名根本
或難保全天下或易騷動禍機已萌陛下悔無及已
臣雖粉骨碎身亦何益於陛下事臣雖欲爲陛下之
忠臣亦無及已愚慮至此良可寒心伏望陛下憫臣
而察其言斥臣去可置臣罪亦可去則得老死牖下

罪則亦不忝爾生謂非臣幸謂臣有怨心皆莽也乞
早賜罷黜以長犯顏敢諫之風或者陛下感言而悟
知臣一身不足恤而天下大業爲重則速下大詔止
巡行之車安動搖之衆坐以待旦視朝決政以德而
勸諸司則又太平天子悔過遷善之令德亦天下蒼
生祖宗社稷之福也惟陛下聽之

救荒疏

明邢尙簡

邑人

題爲連歲凶荒懇乞救卹生靈保安地方事據陝西
布按二司守巡西寧兵備三道叅政江東副使石永

郭朝賓各坐莊浪涼州甘肅邠乾等處緣虜殘之後
累年遭旱霜冰雹蝗蝻且冬無霰雪之積春無霖霖
之潤麥禾吐穗而風吹豌豆開花而日曬大半枯死
秋禾禾種以至田鮮茨梁之獲民乏坻京之賴旄倪
憂懸危同累卵其流移就食轉死溝壑者不可勝計
蓋自地方而論雖有河內河東之異以乾父坤母視
之皆我國家之赤子也臣職在巡察若不思爲救卹
是下負生民也負生民卽所以負國家也因此日夜
籌度皇皇不寧思昔富彞治梓州活民四十萬民有

攸賴臣本猥劣雖非富扈之賢但事係民患安敢袖
手旁觀秦越元元以蹈孔距心立視其死之罪乎卽
今臣奏准將應解戶工二部事例富戶等銀存留脩
賑又候命下移咨暫管倉場本部左侍郎並劄付本
部委管銀庫員外王撫民將庫貯折糧折草等銀量
行動支再查別項堪動本部事例銀兩行委守巡該
道親詣災荒等處唱名驗口設法賑濟務使饑民均
沾實惠又河東河西雖均遭饑饉而河東蘭金臨河
一帶尤爲特甚以故入春以來渡河就食者接踵不

絕已經會行守巡西寧二道於甘州涼州莊浪永昌
古浪鎮番六處各設粥廠動支在倉粟米青稞不問
男女老穉及占籍流亡之人每人日給一次候夏熟
停止又查西寧衛地方饑饉與莊涼等處畧同經會
行西寧兵備道一體救濟緣係年歲凶荒懇乞急救
生靈保安地方事理未敢擅便爲此具本專差承差
孟禎親齎謹具奏聞

諫莊宗乘馬疏

明
孫夢豸
邑人

題爲懇祈懋聖學以崇聖德以光聖治事臣惟論治

道者以唐虞爲聖論君德者以堯舜爲極然唐虞之治堯舜之德豈果後世君人真不能及哉亦以學而可至也昔者滕文公爲世子未嘗學問好馳馬試劍而孟子於其過宋之見也乃言必稱堯舜故其後也喪禮之行井田之復父兄百官悅之遠方之人來之而他口之馳馬亦未有復以此病滕文者何也以其能念及學問而知慕堯舜之道也陛下徃者躬出郊祭飭勞馬上佩劍徃返風沙滿面一時迎駕諸臣多有以爲褻居尊之體惜陛下者臣以爲此未足爲陛

下惜也但恐陛下不能從事學問耳蓋天理人欲不能並立一留心學問則所欲者皆退聽矣且陛下之渾于學問者亦豈其苦難而遂止歟然不知帝王之學自有節要非必摘章繪句抽黃對白如經生文士之習難以遽工也陛下能於退朝之暇召一二十大臣不時顧問務求如何以治心如何以治身如何而臨百官如何而均四海動以堯舜爲的準凡生民之利病人才之進退財賦之出入兵馬之強弱邊方之緩急言路之開闢與否闔寺之縱肆與否日日商確語

語辨白凡有章奏皆親自裁決或有疑而難定者聽三公九卿科道等官從公議勘則恂慄於中威儀於外雖欲馳馬試劍不惟不暇爲亦所不肯爲也且人君之身言則左史書之動則右史書之故古之帝王一言一動不敢輕易者恐其無以傳天下而示來世也陛下卽位二年於茲矣不知左史所紀者何言右史所紀者何動內返宸衷獨不惕然悟乎伏乞俯諒臣言勉強學問奮力身心留神治理如臣前項所陳逐一勵精圖之則朝野仰堯舜之德四方成唐虞之

所以昭垂青史者將億萬年無疆矣社稷幸甚
臣愚幸甚

諫螯山燈疏

孫夢
邑人

題爲災異頻仍懇乞聖明盡修省罷造作以答天心
以慰人望事臣聞天心仁愛人君故屢示災異以譴
告之敬畏則福生怠忽則禍至此必然之應不容毫
髮爽者我皇上建極紹統蠲赦之仁誕敷郊祀之禮
悉舉固宜中和致而禎祥集矣然竊見邇者災異非
常天裂地震人妖物恠山東河南則蝗蝻遍野北徐

秉吳則洪水滔天四方奏報殆無虛日歷稽傳記未
有災異之甚如今日者也是宜籲帝告廟修實政求
直言節有限之財罷無益之作汲汲焉圖所以消弭
之方猶恐其或晚也乃內官監太監孟仲以朝燈鰲
山燈題請奉旨行二部取辦物料一時傳聞莫不驚
駭以爲聖主示儉朴爲天下先假令時和歲豐亦不
宜庸心不急之務况當此災異迭見財用缺乏之時
何暇爲明年翫好宴樂之具乎昨有該欽天監奏稱
明年元旦日食十六日夜月食臣等竊以爲當其時

皇上遇災而懼方將減膳撤樂避殿省躬之不暇矣
雖有鼇山等燈將何用哉且當今之時何時也寇賊
並發羽檄交馳矣兵政不可不豫講也而恬然無定
筭連歲不登萬姓無告矣荒政不可不豫圖也而宴
然無長策府庫虛矣未聞豫求料理之計人才乏矣
未聞豫求選舉之道紀綱日廢矣未聞豫爲振起之
圖風俗日薄矣未聞豫圖轉移之方顧獨於鼇山燈
之可已者若是謀之豫而圖之速耶殆非所以恐懼
修省答天心而慰人望之道也伏乞皇上思天命之

足畏念民力之已竭將前項燈作俯賜停止庶可以轉災爲祥保泰致治民心悅而天意得矣

上賞功罰罪疏

國朝

張志棟

邑人

題爲核功罪而速賞罰章 國法以勵人心事

至一介寒儒荷蒙

皇上特恩選列庶常今又拔置臺班膺此 殊遇敢

不竭一得之愚以報涓滴臣竊惟有功者必賞

有罪者必罰所以勸忠義而儆姦邪也然必賞

不踰時而忠者益勵其誠罰不輕貸而姦者始

悔其罪未有賞不足以勸罰不足以儆而能
動人心者也自吳三桂背逆稱戈南服騷動
城野戰之地有捐頂糜踵而爲朝廷用命者
有貪生畏死而致邊疆失守者或殺身以盡節
或背主而從賊爲忠爲姦判若黑白國家
聞之未嘗不痛忠臣之塗肝腦而報主知恨逆
臣之顧妻子而棄土地也固將大示誅賞以爲
儆勸乃有功者宜賞矣而必待於事平之日從
容而議叙有罪者當誅矣而或恕其投誠之心

遷就於法網甚非所以酬忠義而懲姦邪之道也臣竊念効力行間者致死捐軀於衝鋒對壘之下其忠憤丹誠固昭揭天壤然亦容有并一命而爲父母妻子光寵之意而議叙必待事平曠日遲久則鏖兵敢戰之夫親見忠義者未叨殊典誰肯出萬死一生之計以異俸後日不可知之恩至苟且觀望之輩昏庸駑怯賊來則開門揖盜而搖尾乞憐於叛逆之前賊去則託言投誠而昂首論功於喪敗之後此輩大節旣

虧良心已死矣衣冠而禽獸也待之以不死亦
已幸矣乃又從而復其官夫賊來則爲賊賊去
則爲官彼亦何所忌而不輕棄城何所畏而不
自保其軀乎臣以爲有功者當隨時議叙不必
俟諸異日而失節無恥之徒仍當論罪行罰卽
情宜寬宥亦必奪官褫爵斷不可復其故職長
姦邪之風而短忠義之氣也如此則有功者感
恩圖報計不旋踵卽無功者亦勉奮其志氣其
他失守之臣知朝廷在所必罰旣難遁於法

外自不敢陷於法中共篤城存與存城亡與亡之義而不輕棄其土矣

請用兵後施仁政疏

張志棟

邑人

題爲寰宇蕩平已久百姓望恩甚切敬陳一得之愚仰祈

睿鑒採擇事竊惟我

皇上武功大定四海太平稔知天下之民皆翹首跂足以望浩蕩之恩波遂於民間疾苦無不用恤臣雖愚昧得逢如天好生之

聖主又值此昇平愷樂之昌時敢不舉仁政之宜行者爲我

皇上陳之一曰緩催科從來則壤成賦小民食土之毛而供其輸將分也亦理也自軍興旁午以來糧餉攸需國家萬不得已於正月開徵當此土膏未動播種未入之時小民家無餘儲迫於吏呼稱貸輸納及麥秋禾熟遂罄所有以償私債是小民終歲勤苦而曾不得免饑寒之困臣思今年大兵已盡凱旋糧餉非亟宜於明春五

月開徵百姓稻穀既登公輸易辦無煩敲扑如是則民既無稱貸之艱而官亦得盡撫字之術行之數年則民力充給元氣全復一日恤災獨鰥寡孤獨王政之所宜先也此種卑窶一身俯仰無資衣食無給直窮民之無告者日者兵餉匱詘其給養不無稍爲裁減今旣邊方大定臣請槩復舊額量爲增加務使均沐實惠不致啼饑號寒一曰掩枯骨掩骼之文載在月令後世鮮有行之者惟唐貞觀二年詔收隋季暴骸史

書美之嚮者逆賊叛變使我

皇上無罪之赤子多死於鋒鏑橫棄原野聽其暴露
良可哀憫及此不收久之化爲青燐鬼火亦足
成水旱之厲臣請

勅用兵之地並所在戰場如有無主骨骸設法收瘞
無致暴露凡此三事皆仁政之宜亟者仍
督撫有司各仰體

皇上好生之念務以實心而行實政不得視爲具文
臣見仁政普被萬物皆得其所而天下頌

聖恩於無既矣

賀平交趾表

明黃福
邑人

天地以生物爲心四時順序聖人以安民爲德一視同仁干戈囊戢而海宇清平禮樂修明而神人歡慶恭惟皇帝陛下與天同運如日方中齊唐虞之文明重華協帝邁周武之功烈廣大如天顧德威之所加惟遐邇之所服聲爲律而身爲度車同軌而書同文夫何交趾之炎荒敢違中華之聲教爰稽厥土實古邇夷在漢唐能僅驅羈臣元宋尤爲叛服逮乎黎醜

乃踵弊風負非蛙之見而自尊其涸魚之禍而莫恤
奈何簡定之餘孽復救前尤繼而季擴之狡童再徧
覆轍逞狐鼠之威而蹂踐疆域恣蛇虺之毒而吞噬
邦人邊塵瀰漫蟻蜂屯之是覩田里蕭索雞鳴犬
吠之不聞盡傷造物之心憤激神人之怒皇上每垂
戒諭屢擴至仁彼乃愈肆跳梁恣爲不道爰興睿筭
用命偏師天戈一指而蟻穴盡空風帆再舉而鯨濤
頓息渠魁旣殄遺孽悉除共推拯救之勤式慰徯蘇
之望班師振旅喜文德之誕敷行賞錫封覩武功之

載戢郡邑有守令以懷保衛所有士馬以隄防三年
草莽之區變爲禾黍之地累世雕題之衆化爲衣冠
之民衣食足以養生絃歌足以易俗輿圖舊物予以
光復山川精彩予以發舒賦列九州不止金人之貢
化均萬里遠踰銅柱之功氛侵廓清雨暘時若實有
懋先之盛德冠古之隆功致今日之大平雪前日之
遺恨也臣俯慚微賤幸遇聖明垂憫愚蒙有罪特加
寬宥位階卿輔受恩實荷深洪始詔闢百粵之新藩
遂令掌三司之重寄拜命惟謹懼德弗堪易俗移風

勉承流而宣化彰善瘴惡誓激濁以揚清遠慕臯
之良尚隆唐虞之治然遐邇之地雖異而感報之心
悉同凡霑雨露之民室家胥慶獲際風雲之士冠冕
增輝咸欲覩照臨之清光於以謝生成之大德臣心
感激未能率領以來朝天闕遙深徒切仰瞻而下拜
敢效華封之三祝恭祈聖壽于萬年

碑記

黃忠宣神道碑

明楊士奇

自古仁人君子明夫道者恒以天下國家爲心而不

爲其私計范希文言士當先天下之憂而憂後天下
之樂而樂夫天下之大抱負斯志者未嘗無人顧其
志得行與否則係於所遇以希文之志猶不得盡行
其道於當時非所遇之難乎然士之卓然有志者則
不以是而或怠也三十四年間士奇所接名卿大臣
若東萊黃公其可謂有志於希文而無愧者也公稟
剛毅之資持正直之節懷忠厚之志負遠大之器風
流重器量宏偉而表裏洞達博學好古篤信不疑
不苟爲同不獨爲異不爲勢拘不爲禍懼惟義是循

惟道是行豈非士之卓然者與公東萊昌邑人以書
經選中洪武甲子鄉貢入太學初授項城簿改清源
縣皆有及民之政除金吾前衛知事改龍江左衛蚤
暮勤職而才識明敏剴剔宿弊數出意見輔益上官
陞本衛經歷上書論大計太祖皇帝覽而竒之超陞
工部右侍郎特見信用太宗皇帝初臨御治齊王離
間之罪李景隆於上前指公姦臣公厲聲言臣罪應
死但目爲姦則非臣所甘上知其正直不阿遷左侍
郎遂陞工部尙書凡所陳奏悉見嘉納歲餘天下工

匠集於京師者多疫死都御史陳瑛以爲公罪奏又不問初建北京置行部時北方用兵累年民弊甚首改公爲行部尙書公攄誠盡瘁植什濡焦而民以蘇交趾逆命遣大將軍率師討罪命公先詣兩廣治軍實調度有方用足而民不困交趾平郡縣其地建都指揮使司布政司按察司總之設官如制命公以尙書兼掌布政按察二司印章而董其治公視民如子循其所欲革其所惡勞之輯之訓之飭之躬勤不倦且戒郡邑吏咸修撫字之政吏承公仁無敢違戾公

撫新造之邦治新附之民政令條畫靡間織鉅悉盡
心焉於是交人戴公如父時中朝士大夫以遭謫而
全者咸見溫卹或有疾病躬造視之援其貴者與之
共事以教導其民悉知禮焉中官馬騏怙恩肆虐自
三司以下皆縮首斂避惟公數裁抑之騏誣公有異
志上深照其妄曰此君子不容于小人寢其奏公居
交趾幾二十年仁宗皇帝登基上言六事悉蒙采用
時初建儲君驛召公遺璽書有元老久勞於外篤志
忘家亟欲見之語瀕行交人扶老携幼送公皆號泣

不忍別旣還深被獎勞賜白金文綺遂命兼詹事賜
誥命追贈二代無幾仁廟上賓公董山陵之役宣宗
皇帝卽位馬騏澂變交趾時兵部尙書陳浹代公掌
藩臬二司累奏乞還公以慰交人之心公時方持節
冊封親藩卽日召還奉命復詣交趾偕大將率師討
之總師者失律公爲寇所得寇皆下馬拜公曰公不
北歸我曹必不至此言已皆泣共置公於館父事之
公度寇無悔罪意卽不食與死寇謹防護不去側竟
禮送北歸遂奉命偕平江伯陳瑄董江南糧運上言

足食足兵省役三事皆切於時務並見嘉納宣宗
公春秋高久勞在外改南京戶部尚書進榮祿大夫
少保仍兼尚書參贊襄成伯李隆南京守脩公時雖
老事無巨細必周於慮而裁處悉當襄成伯惟公言
是聽文武諸司凡有疑務咸就正焉於時南京政肅
民安蓋倚公爲重賜誥命授光祿大夫加贈三代又
上言學校田賦鈔法鹽法官俸數事多見施行正統
四年冬得疾猶時時起議公務明年正月五日薨公
自小官至一品始終以國家生民爲心嘗取希文語

名其退食之堂曰後樂臨大事決大議衆或掎阿公獨奮斷衆或辟易公獨勇往人有善告樂從如流發姦闢諛無所顧忌下人有過多見優容所與交遊必輔於道憂國忘家老而彌篤所得俸賜率分族姻屬續之日室無百緡平生立心行事一以不昧天理爲主享年七十有八葬昌邑西新郭之原土音與公同朝四十年晚辱公知甚厚未薨之歲予蒙告歸江右道過南京公時有疾首造焉躍然起執予手論國事不片言他及嗚呼言猶在耳安得復見正直憂國如

黃公也琮求書公墓上之石敬序而銘之銘曰維天
佑命篤生賢人爲上爲德爲下爲民忠貞其志高明
其識道在我躬祇行弗易遭奉列聖旣五十載崇爵
厚秩揚歷中外靡遑夙夜靡間寢興殫智畢慮顓顓
用誠益下以惠益上以德敷厥謀猷亶時正直凡民
被疾猶痛在我民旣有瘳我食斯下南交初附詔公
撫循育之訓之昭其春溫交人戴公曰我父母有詔
歸公如失恃怙肅肅其度內直外方不苟不吐推賢
讓能先哲所有後天下樂公實承之秉執有確國之

有公柱石在堂士之仰公如權如衡曾主林林疇並
公志遽不憖遺匪時之慨

逢萌祠記

明 鄒善 提學

予讀逢子慶傳未嘗不歎齊之多士何也淳于髡辯
士也陳仲子廉士也魯仲連天下士也若子慶豈不
稱高士哉觀其擲楮之歎掛冠之蹤首盜之哭與所
遊者或隱於俠或隱於僧其志氣亦深遠矣當新莽
時悲三綱絕而逃隱宜矣乃光武中興竟亦托耄齒
不就徵何與武訓其恥諫議之授恩大行之難然耶

吾耶子慶故爲昌邑人年友孫應兆氏訪其子孫不
得乃建祠西山麓肖像祠之屬予記予謂宜謂書院
以養志名蓋取諸萌本傳云方子慶之恥爲人役走
大學學春秋及莽敗漢興乃復自遼左歸此其志亦
非欲長守邱壑而不以濟時爲心者史稱萌養志修
道人化其德似有以窺其微矣至於齒之果耄與否
意之果有所托與否亦不足深辯獨謂天壤間自有
一種高標足以廉貪立懦有補於世教者若大暑鬱
蒸而清風倏來喝者始有欲蘇之漸何則人之處世

其跡固混混爾使咸如鷄鶩營營終日而竟不知所
以營營者何事亦虛浪等死耳至於雲鶴則五步一
啄十步一飲翛然無求於世而神固常存彼其志誠
自遂也漢迄今千餘年其富貴湮滅者何限而子慶
獨流光耿耿則世之營營不自知抑又何哉史不言
其志并所以養者其欲人深思而自得耳萊之西境
有孤山舊祀夷齊豈避地北海之所茲其聞風而興
起者歟夫子於夷齊咸以逸民目之若子慶所謂逸
民者非耶子曰我則異於是無可無不可夫論人取

館處已貴。予將與應兆氏勉乎其極而建祠撰記
以高子慶之風其欲緣此勵世而冀養厥志亦未爲
不可。

撫憲芳洲洪公生祠記

孫夢

邑人

我邑北濱大海南繞濰河東當登萊之衝土狹而瘠
役繁而重又以西近衛藩民之土田半爲官校執役
者所侵奪田去稅存徵輸日迫姦猾以壯者望風以
投而善良老弱垂首待斃民不聊生當路者往往處
之以寬比年吞噬豪奪尤爲恣橫丙寅秋我芳洲洪

公撫臨東土駐節未幾卽博詢密訪得其惡狀乃執厥魁渠悉置之法還民侵地累年積害不勞餘力一朝剔除復移檄有司申令於衆墾荒蕪勤樹藝嚴保甲舉鄉約巨猾潛迹勉爲良善民之失所者直如拯塗炭而登之衽席也未及期年民悉樂業丁卯秋榮擢南郡大司徒邑之父老於其行也感公之恩旣拘於公不敢相率以留而又不忍其去乃於邑之南津祠數楹繪公之像而祀焉民歡欣奔走惟恐後時未彌月而告成凡我士庶父兄子弟相率而環觀者僉

曰凶人弗禁善類弗安非得我公我之土地何以耕
藝也我之徭賦何以輸辦也我有父母誰其事之我
有子弟誰其誨之我有寇盜誰其弭之紛紛翼翼舉
手加額以祝我公之福澤者萬衆如出一口邑侯李
公展謁祠下亦頌公之德而感吾民之義也徵文於
余以記其盛余惟風憲法官也洪公執法者也執君
之法必不徇人之情公何以得此於民哉書曰民罔
常懷懷於有仁孟子曰仁政必自經界始而先儒之
論經界也曰豪強不得以兼并夫民懷在仁而仁在

正經界抑豪強然則公之執法正所以施仁也民之懷之固其所耳今聖天子御極政化方新仁心仁聞播於九有一時中外翕然望治洪公行且陟師保居台衡左右贊勳立綱振紀用是法以成其仁而薄海內外將咸沐公之仁於無窮矣豈特區區東土已哉謹記其事以勒諸石俟異日之秉直筆錄名臣以大書特書者其或於此有採焉公諱朝選福建同安人登辛丑進士芳洲其別號也

李尹去思碑記

葛

縉邑人

桂南李侯宰吾邑三年政成考最民不忍其去僉議
建祠爲像以志不忘蓋侯德施於民淪洽肌髓群心
思慕故其襄是舉方鳩工飭材相基攻位而欽取之
命下上心之孚乎民猶民心之德吾侯也若茲者可
弗祠乎余嘗考古循吏民之德而思之也有二或思
其去或去而思公孫僑之柄鄭國民俱誰嗣而歌之
在去前羊祜之去襄陽民望峴首而悲之在去後皆
由其襄之弗可以已也吾民之德吾侯二者其兼有
乎何也方侯之來吾邑英年粹質以冰檠律身以學

問飭政人咸謂其不群爾一用而才辯橫出剖決應
斷迎刃而解凡轉節變養調劑瘡痍恤阨危而登愷
濟者罔惜百慮以圖之一時境內翕然改觀海上長
吏治平稱首蓋侯器深而才幹故拊循控御不足難
吾侯也四境之民額手稱慶謂得借侯數年吾田疇
可殖子孫可立昌爲樂土矣居無何有檄傳即下陞
吾侯者民咸有惧色曰奪我召父其奈吾嗷嗷者何
此未去而懼思也及期迫考績聲華茂著當路交章
薦達而吾民乃知其必不能留矣邑之老幼咸依依

歎息曰吾侯真去矣殖我田疇者誰歟立我子孫者誰歟吾安倚庇哉不得已而議建祠肖像以寄吾愛此旣去而懷思也二者皆出乎民心而侯兼得之則侯之德施於民不已至乎况由茲有臺省之選柄用之期舉一邑而天下之心可知思侯者且不止一方一邑而已也昔荆人之祠呂誼廣人之頌宋景皆上一德以相成其卽吾民與吾侯歟後之尹吾邑者將爲李侯耶將不爲李侯耶侯廣西南寧人諱天倫字明之別號桂南由鄉薦任昌邑其來也以嘉靖四

十五年十二月其去也以隆慶四年五月祠之建卽於是年四月肇工五月告竣在縣大門之西至高卑之式廣狹之度及與祠姓氏俱詳碑陰云

陳尹去思碑記

葛

縉

邑人

邑侯陳公來牧吾土未期月以外艱歸里蓋六年於茲矣遺澤之在人心者猶籍籍焉僉欲索余一言鏤之豐珉以志不忘余老矣不能文然其心之感侯而思之猶夫人也語曰樂只君子民之父母夫父母之愛子也其性真其情摯而其用愛也不過深體其好

惡而爲之所耳然則牧民者以父母體予之心愛民則民之愛之也如其父母焉天下有赤子中路失其父母而不思者乎民之恩侯由侯之愛民也由侯之愛民之直一旦去之而民失其父母也吾邑遐處海隅似僻實衝星輶日郵東西絡繹宰是邑者咸曰勞而費矣侯之來也調里甲節民力供應有度費出有稽不至煩靡人亦樂代侯之勞而不自惜其費焉觀風如張柱史濠濱公者稱侯曰不傷財不害民其知侯之直乎邑地廣而人少河決海淤距郭二十里外

沙鹵荒蕪一望無際且賦重差繁民之畜積里無百
金之產一遇水旱不復聊生侯之來也平賦緩征弛
其箠楚寬其期限解其繫縲抑強扶弱民喜於公視
而歲無逋賦逃者復困者息富而讒射者皆輸誠撫
民如梁都憲鳴泉公者稱侯曰真心恤民仇香之長
蒲亭公孫僑之治鄭亦不是過其知侯之真乎邑民
愚而强悍訟差不勝叱咤不顧侯之聽訟也持之
以至虛照之以至明本之以哀矜之心片言而兩造
俱釋故強者服暴者平詐者化弱而不能自植者

折然鼓腹於井里之中一年之內邑無冤民囹圄設
而常空矣監司如郭副憲性安公者稱侯曰忠信明
決剛而不劇直而不撓智而不察幾致刑措如宓子
之治單子路之治蒲其知侯之直乎此數者章章大
著其鐫於人心不忘者也至守已之介造士之勤築
隄堰以防濫衝草雜派以蘇積困隨時注意直欲措
民於衽席之上侯之心非父母之體赤子而籌其好
惡者耶乃德化方洽上下胥悅而侯以聞計去矣徒
跣南奔父老之攀卧而泣者匝道林林然咸悲愴其

去吞聲而返噫侯之真心感人一至此乎侯旣免喪
補任蘇之崇明二年之內其繫民思者猶吾邑也亦
可見侯之愛民甚真與民之愛侯不忘咸易地而如
一矣又豈余之記所能揄揚其萬一哉侯諱文別號
豫西江西靖安人隆慶八年五月以憂去是舉也邑
人僉有同志而建亭礮石首事者鄉先生翟次喬傳
至倫薊鎮旗鼓把總于化鵬庠生姜若洞等實任其
勞

去縣西二里許名曰新郭村近古城遺址今以名村
因其舊也村之西有山近視之若夷遠望則豐隆聳
秀青草蒙茸如翠屏狀其極頂前後又有小峯突起
中區平坦畝餘舊有太山等祠聞之故老云厥初創
建幾見神異今雖漫無可考然歲時伏臘邑中人士
瞻拜祠下者動以數百計往來繹絡若或使之亦可
以稽此山之靈也余自總角時每一過輒盤桓不忍
去及宦遊於外雖日在懷抱然鞅掌王事未遑也癸
亥春以公便抵家取閒登覽舊興復萌因鳩工營財

結廬山麓名曰西山草廬廬之上構一亭亭名心遠
乃太守武川杜公所扁取義於淵明心遠地偏也亭
之上壘土爲臺仍虛其中以甃砌爲小洞洞名尋樂
窩洞上復構一軒軒名玩月蓋以臺高軒敞月明時
來景更佳也又於前後栽樹千餘經營數年室廬漸
多林木漸茂西岩之上煥然改觀矣余今告請東歸
投老於此日與鄉鄰故舊籍草開樽促膝共談山色
空濛禽聲上下不謂人世也酒醉興逸則拍手緩步
直上絕巔俯視塵寰以舒一壺遠眺博望大澤巖若

淡抹輕烟且東山龍盤大阜虎踞其朝拱而環抱者
又不知其幾十峯也他如烟村散亂雲樹參差灘濱
海石咸歸一覽其真奇觀也哉攜手南下載覽載行
過漢高士逢公祠清風高節里之人猶能言之迤北
而東則爲忠宣公墓石獸森列松檜蔥鬱而其子孫
之環處於其側者尙濟濟焉因感此二公者一則名
在宇宙一則功在社稷將與西山並峙千古不朽地
靈人傑豈不信夫率此直北又予別業卽素所明農
處也仍命童子採擇野菜砍取薪柴和根以煮帶葉

而燒蔬成進酒覺有餘味擎杯縱飲不知日將暮矣
少焉月出東方清光皎皎衆皆仰視懽然稱奇酒復
數行余興未已乃對山而歌曰西山崇兮可遊觀以
適吾情兮山有洞兮可靜坐以養吾性兮洞之前有
廬兮可談道而讀書兮廬之外有田兮可躬耕以養
廉兮余幸歸此山兮風月其無邊兮隗宦路之委曲
兮苦何求而不足兮客皆領首稱羨相揖而去余亦
秉燭而歸萬慮澄然不知歷時之爲久也晨興復至
西山草廬援筆記之

重修學宮記

國朝

崇禎
郡守

余於乙卯夏出刺萊道經鄆城其地有三賢埠四知
臺通德里諸古蹟勝甲二水固聖人之鄉抑名賢都
會焉正欲訪游騫輦之芳踪追楊夫子之峻節以及
康成先生理學遺言與鄆人士講莧勵行而不意博
士弟子員廼以募葺先師廟爲請因講述其興廢之
由謂創于大定間王瑀修於至元間馬錫重建於洪
武間程福山再新於成化嘉靖萬年間郭質戴纓侯
鶴齡諸人今年將百矣而芹藻荆榛鐘簋蔓草實爲

師儒羞敢以煩執事余聞言瞿然曰嗟乎文廟視三
賢埠四知臺通德里輕重何如哉而忍令頽廢至此
主持風教之謂何爰捐橐中金以爲倡維時邑令沈
君多病困簿書學博孫君高年艱步履會地寒瘠諸
士子率裋褐不完鄉大夫亦晨星無幾加以旱潦頻
仍軍興旁午其董事醵金與鳩工庀材憂憂乎難之
於是荏苒歲時飄搖風雨昔之所謂傾圮者愈不堪
復問矣嗚乎是誰之責哉吾聞古昔聖王教先於養
而周禮正德之後乃繼利用厚生况乎遵聖人之鄉

與處名賢都會之地乎則修復學宮之役爲不可
也未幾歲獲稔吏事稍閒章令請成余志而又得張
廣文爲之經理孫承方尉爲之協贊一時薦紳先生
與諸子衿皆輸將恐後樂於有成工旣訖但見共矍
於上者先師之俎豆也森列於左右者配哲之几筵
也丹堊於東西者兩廡之檼楹也環跨於中與輪於
前後者橋泮之恢與櫺戟之戟戟倫堂之穆穆也
博士弟子仍請余記其畧余固不文且整其宮牆爲
身膺民社職典教思者分內事耳焉用文之然春秋

重工作雖時且義亦書其間任事之維艱逢時之多
故與諸君子之經營况瘁俱不可泯將後之視今亦
猶今之視昔使萬五載之重修非侍郎葛縉爲之
記則前此百年之就荒何所稽厥後諸公之踵事何
所鑒若繼是而時事綢繆不至圯而重費庶幾紹王
瑀馬錫諸人之躅以無負我輩今日之勞此則貞石
之意也雖然猶有異焉昌固人才淵藪其文章事業
彪炳史乘者不少慨見是役也忽於土礫中得奎門
石湮沒塵墟不知其幾經年所一旦出而示異我諸

上必有大奮魁名聯翩而起者當拭目以俟焉是又
記之志也夫

重修文廟櫺星門泮池碑記

張名齡學博

天下之治亂由於人才之盛衰人才之盛衰由於教
育之隆替而學舍者育才之地也故觀於學舍之興
廢而人才之盛衰可知也然而其廢也不自廢必有
所由而廢其興也不自興必有所待而興余忝司昌
鐸到學之日仰瞻宮廟翬飛矢棘肅然穆清知多士
之傾心於水源木本久矣獨是櫺星泮池之屬荒頽

如故心甚憫焉大懼典制闕然廟貌不稱無以肅觀瞻而奉先聖儒效弗彰人文放失未必不兆於此也邑令沈侯聞而是焉捐貲二十餘金以爲結構整理之資而邑中之紳士翕然從之於是鳩工庀材一就緒無何沈侯捐賓客則事之成不成猶未可知也越明年富陽章侯來蒞茲土章侯仁心爲質道宇深純其爲政也寓撫字於催科沛子惠於獄訟真得尼山之傳而見諸行事者也故於學宮之崇勵尤篤焉工民化之併手偕作兩閱月而告竣厥門有伉作

津尹匹丹漆黝堊靡不如法炳炳烺烺非復向日瓦礫之場而巍煥之觀矣噫嘻是役也前人爲之而規模弗周沈侯繼之而營繕未就其卒成之者章侯也豈非盛事待人而興哉工旣訖矣廟貌肅矣又得章侯有道仁人以爲帥表爾多士由之就將於斯禮樂以陶其性情詩書以勵其節義踐迹入室得志而上以黼黻皇猷不得志而下以扶正人心使天下後世沐浴壇之澤於不衰是則章侯之志也夫豈徒土木麗華飾學宮之觀美而已哉勒諸石碑諸生之出

入於是者覽而知儆云

新建奎星樓記

周來邵 邑令

昌邑歷代沿革頻殊春秋莊公元年齊師遷紀鄆鄆
卽今邑也余來署此考祀典詢文昌祠所在吏白曰
治城東二里許俗呼東京埠上構閣數楹春秋致祀
焉旣而禱祭余偕僚佐詣祠灌獻瞻拜文昌端綬垂
紳有君像焉有帝像焉奎星屈曲相鉤有似文章之
畫大文人文理相通氣相感唐虞事業孔孟學術
啟諸此由來尚矣祠而祀之誠宜雖然余嘗疑焉文

昌帝君有其人耶無其人耶有其人耶乃閱梓童傳
書中多怪誕語疑若不足信者無其人耶詩曰張仲
孝友又疑有其人也孝經援神契曰奎主文昌張仲
果其化身耶粵稽奎星星非人審矣或曰宋有昌永
紹興中奏名第一帝陋其貌改奏緣此隕命後人哀
而祀之肖以鬼像然耶否耶余考天文志諸書參差
不同然胥云主司文明故祀之足佑文明實以人則
近妄余謂星者乃萬物陰陽之精質麗於地氣行於
天觀金木水火土五星則他星可知矣古人云善言

天者必有驗於人肅將在下感格在上天人之際陟
降原自一理祀典載祀文昌帝君義蓋取諸此也匪
據化書始爲致祀余初讀化書觀其自叙忠孝友于
惓惓欸欸與詩稱張仲有相合者然歷叙化身忽人
忽神忽仙忽佛未免奇幻不經母乃好事者附會歟
抑莊周所謂齊諧誌怪歟顧其事不見他書且涉釋
氏輪囷之說揆諸堯舜禹湯文武周孔所傳授者殊
爲左道奚足列諸祀典至他傳宋昌永卽奎星尤僞
說不足辨大抵天官天文諸書所紀近是天官書曰

尋帝事又曰斗魁戴匡六星曰文昌宮與天文志所
云寶瓶諸宮同史周寶儀嘗曰卯歲五星當聚奎宋
太祖乾德丁卯五星聚奎主天下文明由此論之星
其像也像之神則帝也厥精聚光故主文明帝君奎
星詎有品秩區別哉乃廟貌祀之肖像帝君若曰像
主司文明者耳肖像屈曲相鈎若曰像文章畫耳於
理無甚倍雖然像既有異位自不同位既不同而何
以合祀也今世俗不深維其義帝君奎星異像合祀
一面離正位一東向侍立居然尊卑有差噫嘻文尙

雅馴似茲布置何俗不可醫也余辛酉春仲承開步
東山詣義學課士見邑人起樓於山之東南於封則
異所謂文明地也將移奎星於上余喜有聞起意庶
敗合祀配享之謬爰出餒飲助俾竣厥工且伐石記
之以曉俗人文之工拙未遑問云

文學先生錫永劉公墓記

連科

邑博

天以顯道維終古雖留陽九百六之運而常有以自
持持之者人也實天之自厄其運而乃以孝友義烈
特賦於一人之身以力持於險巇危險之地方明之

季大亂猝發乎不虞薦紳士族閭巷黎甿同燬玉石
於崑岑者何可勝指求其完大節持綱常身試白刃
赴親難於倉惶之會卒能完身以保親如都昌文學
公者蓋不多得也公考諱達邑之增廣生方歲己卯
病篤時公尙幼泣問曰何以命兒公考謂曰國運方
艱吾祀斬否未可知也將詩書亦委東流乎語畢而
逝公經紀喪事未葬也越二載壬午臘月朔大兵猝
至公夜掩棺黎明扶母入城十六日城陷公扶母走
東山下遇兵將手刃其母公傾身護母頭號泣曰寧

殺吾勿害吾母兵憐而釋之及兵退同母四望視父
柩無恙公之仁孝懇誠非天特賦以奇節而自持其
綱常者耶嗣是兵亂相仍公孤弱瀕於危者數然所
以奉母無不至母素爲公成名地公聞命潛泣徐應
口果爾將無以成父志母聞歡甚順治十三年母以
壽終公哀毀成疾處苦塊不入室者三年終身不聽
音樂每至親逝之日輒滂泣公於子道洵可謂夷險
不虧矣然公德孝天成而性尤嗜學淹貫墳籍四方
多來就業揆諸先人詩書之念公庶無忝焉顧獨述

遭艱於一遇厚於德而薄於命豈天無意於公也然
公生子四人其季子時中南弱冠試輒冠軍學使者
稱之不容口甲午遂登賢書三子厥中亦以友愛著
名不得於身而得於子天之報施仁孝豈其爽哉蓋
能完綱常者公也不以困蹇而易其性則天之生若
人以自持其運會也天之於公殆非無意者矣公諱
胤昌字錫永世爲昌邑人年五十八歲卒葬西岩山
東迤北古灘水西岸私謚文學先生余忝竊甲午副
薦於公季子有同年誼其視鐸昌邑也公之孫務虛

爲弟子員故余聞其家世最悉務虛欲記公墓請文
於余余因不揣謏陋道其所賦於天者撰文一篇至
於公之杜門著述牖啟後進所以得謚文學者丹鉛
固不能盡述也

魏烈婦碑記

陳之楓 邑人

烈婦魏氏邑巨室公女也幼時坐立端方嚙笑不苟
性至孝母病奉湯藥唯謹十七歲適庠生延泗李公
次子芳芳有夙疾婦教之醫且戒病源公姑聞之喜
曰真賢婦也婦事公姑必勤必敬每薦飲食侍案下

不去相夫子琴瑟相叶無違言如是者十載不幸於
庚戌季冬夫病且死廼扶柩大慟曰君死矣妾何生
爲且無遺孤可撫未亡人將報吾夫于地下也越五
日扶夫柩葬埋畢入私室和淚檢箚出其衣服簪珥
以爲不忍復用者也家人疑之且防之力因謬爲喜
色曰吾不食者數日矣願且食食畢曰吾不寢者數
日矣願且寢家人信之有間始至室叩門不應遂縊
焉是時葬後三日年二十六歲事聞督學羅旌其門
曰克明大義且諭立石於墓前以垂不朽于婦兄

邑志卷之八
序
庠生德齡與婦之夫兄芬乞予爲誌予按其行狀節
次之無飾詞焉

建社倉記

周來邵
邑令

社倉之法昉自考亭宋乾道八年下考亭社倉法於
諸路是時浙東大饑社倉法行民無菜色財不匱乏
業有成效矣其法甚良而易行量力捐輸隨時積儲
守掌由民歛散由民無催督之煩解中飽之患凡所
以豫國計衛民生補常平之所不及者至詳且悉誠
通千百世而無弊者也余自陽信特調昌邑蒞任

之始卽以社倉爲急務因詢吏舊儲幾何吏據六百
餘石以對係前令屠所貯後遂無繼焉者余竊疑之
夫以至便之法行愛養之事兼奉 憲檄屢催而數

年來貯倉穀石寥寥無幾豈歲之不登與亦昌之士
梗民頑蔑視有司之化誨耶余不自揣乃加意奉行
先倡捐穀石如千單騎減從親下鄉村遍傳紳士耆
庶聚而談焉諭以社倉之利且便紳士無不首肯者
而耆庶數百人且群焉歡應曰侯爲吾父老子弟謀
生全免凍餒俾貧者通緩急固不患其貧富者出贏

餘亦無損其富吾儕奚所苦難而弗爲也余是之且喜且勉因思無好人三字非有德者之言而昌俗疲悍素有傳聞似亦未可深信也於是謀設社倉處所在城一四鄉各設二所遴擇殷寔老成者爲倉長士民踴躍鼓舞開誠樂輸或以石計或以斗計或以升計不拘定額其入倉之糧亦不論穀麥秫豆咸聽自便行之二年摠計則倉者蓋五千石有奇矣每春聽窮黎借支至秋一分起息還倉倉長司出納斗斛以公倉庾無浥爛之虞小民獲周通之益所謂法良而

易行者豈不然乎抑猶有進焉方今 聖天子加卹

元元各 憲仰承德意表率所屬余雖僅宰百里不敢具文相視所望賢士大夫巨家富室知樽節務蓋歲各捐餘粒永久是圖期有始而有終勿尋輸而尋歇仁風廣扇義路常由則官斯土者有厚幸矣

星星記

于始瞻 邑人

灘東八九里有小邱名星星邱之西北則小村抱其麓亦以邱名名之村首多奇石欽歆礧礧攢累相壓或凸或砌或陷或絕或秀出若峯旋迴若巒或勢峻

將崩若熊羆之搏人極方圖之巧殆不可悉邱上出
泉曲流至村走石之兩里間則天然爲石渠其底之
平者全石成之水奔流其上厥聲瀧瀧然乃秀絕者
底雖平而石皆天然有穴罅電弔錯置其高者四三
處可步而過也水至穿穴奔赴故其流有聲下則窪
然爲池不可瞰其底澗波漣漪流沫成輪旁多平石
可坐立尤於濯足爲宜其下爲平沙水勢頗淺上人
俯以石橋便來往由橋而西復曲流卒入於灘是地
也高聳者數處可闢以爲亭其絕壁可俯視者下若

波於意其中猶多美石可掬以爲池惜無有力者
之徒湮於耕夫牧人之耳目彼造物者豈能盡出其
奇哉邑有姜公者謀其地而居之買園三畝爲楊氏
世居在石之東數步猶未得其絕勝也余聞而徃遊
焉則儻蕩而不知歸曠然若與異世者遇方謀窮泉
之上出以爲快也遂記之

傳

烈婦徐氏傳

明史載敷邑人

烈婦徐氏者王姓妻也萬曆丙辰春大饑人相食嬾

女南嚮名販稍徐歸於王時王饑甚而瀕於死也徐
刈草根啖之盡再掇木葉啖之盡又嚮所鞠子女啖
之亦盡徐度不免佯謂王曰盍嫁我以活若王不從
徐茫歸告其父曰王饑甚速嫁我父未及決徐遂自
嚮於販兒矣時王之子母兄弟僵於室徐得銀兩餘
遂買粟餅所餘銀付於王曰好收之此汝命也王得
銀粟闔室遂活皆徐嫁之力也販兒促徐偕諸嬖女
而南臨行徐北望而泣曰我爲王氏至矣販兒不之
防也夕過太史埠前天地昏闇澗谷崎嶇徐遂逸於

林而縊死焉聞事卒無聞其幽者史載勲曰哀哉烈
嬭也苦哉烈嬭也始不難一嫁以活夫終不難一死
以殉夫從容慷慨其一畧心事真女中文信公也夫

節婦黃氏傳

于沛霖 邑人

黃氏者邑庠生黃轉乾女也年十九適邑廩生孫泌
如爲繼室甫九月值壬午變城陷氏被掠出城度不
能脫遂誓不絕口期一死耳兵大怒刃其頸立斃夜
半復甦時氏舅席玉公姑胡氏與夫泌如亦竝罹難
氏未之知也洎兵退有姚姓者覆其尸而識之告氏

氏痛哭仆地欲死者數適氏母抱嬰兒至乃夫前配
宋氏遺子也方三歲氏警撫之曰兒尙在耶吾義不
戴天今兒在是孫氏一脉固未斬也育孤葬死乃吾
事吾不死矣扶創飼哺卵翼脩周母子二人相依爲
命殆不知爲宋氏出也亂甫平卽念舅姑與夫藁葬
不成禮遂卜吉穿壙爲更遷之舉舅姑初有棺遷而
合諸墓夫無棺爲之棺遷而寄諸墓之側克襄大事
一如儀制時順治二年四月十一日也氏受產頗豐
時垂誕衆顧虎視鷹攫者徃徃而有氏卒瘞陰雨

不遑旦夕安茹茶飲槩薪水弗給自若也或曰此非
人所堪且此子非若生盍圖之氏厲聲曰是何言與
若業已死矣而之生者或天欲存孫氏孤也敢有他
志以爲夫子玷撫兒七歲命名琮教之書以母而兼
父督課不少懈琮弱冠入泮旋食餼黃氏力也噫吾
于黃氏有數難當壬午之變日月晦而乾坤幾易卽
有女士難以自全此息媯所以抱恨於終身也而氏
寧以義死不爲所辱抑何烈烈乃爾乎且年未二旬
婚未一載竟視舅姑之恩若天地夫婦之義若山河

兵燹之餘爲之服爲之葬所謂仁人而孝子者不圖
在巾幗間也况乎襁褓弱息宋之自出而氏曾無形
迹之見以養以教俾底於成抑又慈已語云死或重
於泰山或輕於鴻毛使氏當亂離時舍生取義死不
旋踵哀哀藐孤誰爲伊撫慘慘白骨誰爲伊封蕭牆
戈矛誰爲底定漂搖風雨誰爲拮据尙忍言哉尙忍
言哉氏獨爲久長計不以烈殉畢事自壬午迄今四
十餘年勞勩如一日松栢之節歷霜雪而彌勁氏其
無媿也夫今聖天子詔督撫守令具節烈以聞而旌

表之如黃氏者何可沒也前令党公旣載其略於邑乘而予復傳其事以俟採風者入告焉

徐烈婦傳

王翼邑令

烈婦徐氏郡廩生經世妹也天性柔順貞靜寡言笑持大體甫十歲事父母最善成人罕比幼字儒童林夢禹夢禹聰敏好讀書烈婦于歸後勤女工佐膏火夙夜不倦相夫子有凌雲志然夢禹夙抱癯疾兼以勤勞丁酉九月下旬竟中蠱症時烈婦年十九焚香祝天願以身代俟轉側哺湯藥晝夜不倦者數十日

客歲夢禹讀小學談及節烈婦歔歔泣下讚嘆不置
若有自負者永訣之夕謂夢禹曰亡之命矣夫願少
待與俱逝夢禹瞑目而妯氏視含殮絕不露雉經語
衆亦莫之防潛至夢禹讀書所引繩就縊適某戚遇
之救不死防閑遂密共相勸慰曰俟汝父來氏應聲
曰諾時已質明父至翁與議過繼嗣子守志氏日養
親孝也立後慈也慨許允誓此生靡他居二載孝事
翁姑冰霜矢志無奈翁也天只不諒人只憐其年少
無子欲令改嫁體人情從鄉俗也乃翁姑意動而事

未形武會意而志已決因而祭掃夫墓因而歸寧母
家談笑自若居一二日卽返是夕戲翁姑熟睡遂墮
櫛整容粧飭衣履出紅巾縊死于夫讀書所顏色如
生形容未改鄉鄰莫不嘆異曩之聞烈心許者于今
躬蹈之時康熙己亥正月十二日也年二十一歲嗟
嗟自古皆有死特患未獲死所耳若烈婦者坤成也
從容就義弱質也視死如歸形骸雖歿靈魄如在千
載不凜凜有生氣哉諸生其事聞余嘉其烈旣旌其
墓建石刻銘復爲之傳以誌不朽焉

齊烈婦傳

劉育杰

邑令

烈婦齊氏生而貞靜曉大義四齡字儒童劉乾淑淑父汝懋氏父太印皆昌邑太學生也氏于歸夫婦相敬如賓有齊眉風告廟後約淑曰生母早世賴繼母撫育克成室家願與夫子事之倍加孝敬淑爲飲泣氏亦含淚聞者咸歛歛曰某家兒婦真儒家女也越百日歸寧時乾隆戊午春仲淑讀書西岩下夜半暴卒氏聞幾慟絕母知女性素烈遂與同赴淑喪旣抵喪所舍殮完具對夫窳默然若自誓始婉詞慰曰命

也幸自愛氏北向再拜次環拜次夫靈已而翁姑道
弔客氏謂母曰夫婦耦也夫死兒活奚忍母恩未報
願俟來世母曰汝翁姑一子今故汝再殉翁姑誰依
氏曰兒籌之審矣翁未老姑壯舉子有待且出兒奩
資質錢可百緡亦足納妾爲後嗣計母愛少女不忍
更勸維時日暮命婢輪侍少頃日昏命婢秉燭眎氏
寢氏就寢故爲熟睡狀婢乃息燭伴氏眠夜深氏取
紅縉成握爲纒自縊纒斷再取繫絲併紅縉爲纒復
縊垂絕忽斷氏仆地不復醒人事群婢驚寤亟然燈

火扶氏起姑母俱至氏漸漸甦且涕且訝曰兒與夫
方拜哭壙中猶在牀榻間乎是夜合室淒然百端解
說氏哽咽不一應既曉臨夫柩哭不成聲竟五日不
粒食母撞顙痛勸食少許由此防氏益密母爲不解
衣姑刻刻徬徨氏側氏不自安強致溫語謂母曰兒
兩次投繯天憐兒使不死奉養翁姑終厥天年然後
兒與夫重會泉下誠所願也惜兒年幼無子敢自太
人請翁姑命議置嗣續爲兒守節地母曰唯唯父太
印聞之具復翁姑是時烈婦口不言死死志彌堅憂

愁幽思形容憔悴居數旬頸痕瘡暴發淤癰隆隆肉
潰膿流忽于夜分嘔紫血數升迷罔悅惚謂母曰兒
夫戶外侯兒久矣呼婢視之啟戶寂然如是者數數
翌辰溘然氣絕年十八歲時乾隆戊午夏六月九日
也論曰歷考傳記所載節烈婦衆矣或慷慨或從容
均傳不朽然余以齊氏爲最齊氏巾幗弱年耳伉儷
僅三月頓爲投繯且絕粒何其烈也及志不克遂惓
惓懇懇疑如不死者然乃貞魂義魄鬱結胸內焦如
焚如薰肺灼腑必爲殉夫鬼始止烈烈中又何苦也

意嘻慷慨從容氏殆兼之乎余旣匾其門復次其事
爲之傳

孫孝子傳

明宋濂

孫孝子諱惟中字伯庸昌邑人祖明父休世爲州昌
農孝子朝出耕夜讀古人書性雅愛宋名臣言行歷
歷能道之凡所謀猶恒取以爲則年及壯用推擇爲
寧海州史一年貢益都府瀕行會父卒皇皇如欲無
生縣有漢昌邑王廢城舉柩葬城中結庵廬其側籍
苫以居曠野無人深夜月冷哭聲依稀隨悲風遠聞

人爲泣下日啜淖糜二孟邾酒肉弗御晨起無火捫
雪頰面輒詣墓前拜久之手足皸瘃形容憔悴甚或
勸其還哭而不對閭師韓泰亨帥閭巷民言於縣縣
尹戴友諒弗之信將廉之伺夜半携二蒼頭出風雪
中抵庵廬而聽孝子聞足音遙問曰暮夜欲何爲戴
嘆息而去以爲不讓古人亟上之府部使者加以覆
察如縣言請旌其門文達中書禮部不報孝子長身
美髯善談古今事遇子弟若嚴師家法著於井落多
效之娶劉氏從孝子之化居舅喪亦不近酒肉三載

三子尙志尙文尙德尙志業爲儒今擢禮部主事云
史官曰李壇據益都孫明被兵掠至洪溝去家三十
里年始十歲兵以童也易之明夜遁偃偃亂行有父
老教之曰兒但從吾指以往卽至家矣明如其言走
固堤鹽場中草深滅頂而豺狼克斥明竟得還父母
亦避兵方歸舉燈索明不得相向哭燈忽作花復自
相慰曰我兒其返乎不然此花何徵也言未訖忽聞
叩門聲啟視之乃明也亟挽以入初父止生明今明
之子孫逾四十八而惟中又孝行卓卓如此天之不

絕孫氏者其有以哉其有以哉

亭

張孝廉四書文序

徐炯提學

余往者視學齊魯見張子退思之文而異之謂其不止於速售也無何而張子遭其母夫人憂不與於午闌及乙酉閱試錄又不見退思名余念其哀毀廢業之久困躋抑鬱而又捐糶於名場甚恐其氣頽而志衰也今年來吳中呈其所爲文百二十篇余讀之煩以滌懣以舒勸以醒番番披誼之不知日之欲醺也

蓋其言理也如飲食談事也如指掌義必已出徑不由人故按之而愈深恢之而彌廣離奇而氣暢橫肆而法存余旣喜其用心之不同於俗而又壯其意氣之英上不減於昔也因與友人武曹表被摘評六十六餘首刻而行之以益鼓退思之志且以見論文之別裁必有取於其真者也退思家世科第人必疑其守速化秘授之術爲優孟程墨之文以取捷獲而不知退思之矯然自異以猶人爲恥以明道爲期其立志之不苟顧如此也退思勉乎哉遇合數也學問道也

立言制行不可以苟同也子其知之矣守之勿變而
已退思魁梧丈夫子而執禮劬劬如不勝衣聞人言
利達塵垢事不交一語與之談道義則侃侃無所避
旁及天文地理星術數之學比物連類一動百隨
其理莫不橫豎鉤貫使人忘倦是真有志明聖賢之
道者當世讀其制義亦可以想見其人矣

書

上王制府論昌邑鹽政書

嚴有禧
郡守

前者憲節東巡職不揆禱昧輒舉地方利弊面陳數

條並蒙採納仰見大人體國愛民不遺封菲德至渥也茲有昌邑鹽務一事繫民生休戚所關非急爲變通其害滋大敢爲大人縷晰陳之萊屬昌邑縣利漁榆英等灘所產鹽觔向有商名達部而實係竈煎民食包納課程至雍正六年奉 旨清理山東鹽政復行招商辦課價值頓高怨騰民口隨經前制憲察知其弊合安邱蓬萊等十六州縣題准革商攤課自此昌民仍得散賣課攤地畝徵輸票送西出塲截角相安已久近緣濰壽等處商人以杜私爲名具呈運使

并有官臺場大使附和其說混請築包於是詳
院將昌邑額票半赴西由場黃埠灘零配半歸利倫
二灘築包令官臺場員每月逢二七日赴灘稱掣并
諭各商多募巡丁於昌境各灘安設汛堡印給烏鎗
代巡散鹽以攤課之民買本境之鹽必令預先奔走
數十里赴縣領票又俟場員掣期偕帶繩索赴灘築
包既苦道路遠涉之勞又多時日守候之累且驢馱
不能人抬費力以致民販一時失業市中鹽少價騰
兩灘鹽壅竈困遂有私賣盜扒之事而巡役紛紛獲

報散鹽甚至疊傷人命如陳暖被擒受傷張有全被火鎗身死溫芳德被火鎗傷至八十餘處命懸旦夕又有朱名曹受平等皆被擒拿送究邑令呈報絡繹縱橫地方不寧獄訟繁起民情咸謂隣商有謀併昌鹽之意故欲築包以絕其生路怨毒日深歎息愁苦之聲盈於道路有禱身爲民牧安忍坐視其倒懸而不爲之所乎今就現在情形而論築包勢必設商而使民務須散賣查利榆兩灘產鹽最廣更加以黃埠一灘計其所出足供三四州縣而有餘若設商配運

三灘無盡之鹽勛供一邑有定之戶口則鹽勛必致委積灘竈之民豈能責其捐棄工本寧守官法其勢必暗越隣封私販仍難歛迹如謂昌邑界連濰縣恐其浸灌卽議設商獨不思昌邑復與掖縣連界而掖縣亦有灘鹽若昌邑設商之後嚴與稽查不使透濰則鹽歸商運價值必昂掖縣灘鹽又將浸灌將并掖縣而爲之設商乎抑亦聽之而不復更議也若并爲設商則掖縣迤東半屬產鹽之地將不勝其增設若置而不議則同爲辦課之商又未便厚於濰縣而

薄於昌邑恐鹽政紛更將從此始而民間弊累無有窮期矣且前次設商猶係窮民散賣商人不過坐地抽錢尙且膠擾不安終歸題革今若築包設商勢必盡歸商賣卽無抬價病民之事而闔境肩挑餬口之貧民一旦扼其吭而奪其食鄉愚貪利如鶩非僅鋌而走險日陷網羅且恐衆怨所積致生大釁况築包設商並未增引添課總不過爲隣商杜私起見設使昌民陽奉陰違於離灘之後仍復割包散運或整包偷越在灘巡役查拿莫及日久弊生甚至奸商影射

信官行私均未可知是築包設役不能絕外販之
徒滋民竈之累毫無益於隣商益有害於鹽法商之
斷不可設固昭然甚明也然若但照散賣之原疏不
設一稽查越販之法則亦不可愚意請將由昌至灘
至壽之交界路口查明若干處所先行造冊立案然
後將在昌守垣之巡役分派各路口五里以內常川
巡守遇有未經築包之散鹽過界卽行拿送照私販
律治罪倘路口多而巡役少令商人再行招募并飭
兩縣一體撥差健役會巡其利榆二灘鹽觔照黃埠

灘散賣之例槩免築包巡役盡行撤回二灘之竈地
丁課請改歸西由場徵解將西由場大使移駐從前
裁併之海滄場舊地就近稽查越販另照部票原號
設立縣票給與民販赴灘陸續賣鹽場員遴派丁役
在買鹽之處票內填明數目俟買足定額卽收票送
場仍將部票對號截角以昭畫一復清查良販取具
本人及約地隣佑并結印給腰牌以杜奸徒影射再
遴點竈長輪查灘垣使竈戶不能濟私本境要隘分
派民壯巡緝隣封交界各責文武查拏官司失察悉

照定例處分兵役賄縱各予從重究擬如此則私鹽
絕而隣商無越販之憂規制定而鹽政無紛更之擾
鹽輸既便國課益豐餉日有資窮黎樂業誠商民兩
便之圖長治久安之策也恭逢大人曠代偉人中天
一柱民依在念從善如流年來豫東二省興利除弊
之善政已莫可殫述若不於此時亟請挽回歸於盡
善則民累伊何所底乎用敢不避怨嫌爲民請命伏
惟大人察設商之無益民生之坐困亟下轉移之令
永貽樂利之休則德洋恩普直與海岱同其不朽矣

明壬午李張諸公殉難失祀

劉務虛

邑人

壬午兵變明懷宗十五年事也

國初邑侯党公纂

修邑乘錄殉難紳士六十餘人標爲忠義然當時倡

義者縣尹則李公萃秀縣丞則張公其仁主簿則田

君文高訓導則郭焦二公皆闕焉失記此筆墨滲漏

始無深論至雍正二年恩詔建祠崇祀忠孝節義

真曠典也而諸公獨不入祠愚於乾隆丁巳承前在

劉公之命從役志館每披閱至此同一殉難彼廩食

此則浸浸就湮沒而不禁嘆且恨也茲竊詳爲論焉
以志一時之感方大清兵畧山東攻濰不拔引兵
薄昌邑城殘隘又無名將勁卒列陣守險臨以數萬
之衆破之直如覆卵故偵撥一至衆皆破胆岌岌乎
殆將鳥獸散也誰與守必破之空城幸賴李張諸公
驚聞戒嚴決策堅守分汛連伍身爲督率雖牧童稚
子咸奮不畏死卽此城守之初諸公忠義鼓勵已殊
尋常萬萬矣昌濰錯壤壬午十二月朔烽火相望越
八日清兵長驅昌境不數日圍城三匝十五夜分城

幾陷諸公親燃燈火急鳴守鼓乘樓櫓飛機礮力催
敵衆敵衆乃稍稍退翌辰十六敵衆蜂湧城東北用
駕雲梯炮弩齊發登陴者一可當百亦難支持張公
見事急大呼曰我食祿天家爾紳士亦當報國寧碎
尸毋爲若屈言已敵兵挾刃登墉魚貫而上莫稽其
數張公奮臂格鬪傷敵數人敵怒支解張公李公等
亦被刃死瞬時積尸盈街流血如川慘矣哉此變也
夫李張諸公職司守土命殞孤城揆諸祭典所謂以
死勤事洵有合矣而忠義感激且使一城紳士盡爲

殉難以視夫敵臨魄落棄城投降僞死竄逃者不大
相逕庭乎此卽獨建一廟顏曰忠臣春秋祀之俾官
吏紳士世世登降灌獻其中亦禮所宜乃今竟何如
也愚入忠義祠瞻拜殉難神位祇有紳士夫紳士固
忠義性成然聞諸公數語而志氣倍加激烈迄今猶
凜凜有生氣是諸公忠義實爲紳士忠義之昌而顧
不得分享廟食忠魂何以慰也蓋嘗推極而論之五
德迭運興亡互乘然皆恃忠義爲社稷靈長之本以
永天命以培國脉胥取諸此是以勝朝壬申孔叛之

變萊園奏捷廟堂議卹當時楊彭有全城之功不過
授以摠叅若徐若謝若朱則獨隆厥褒封優以祀享
夫豈故爲參差厚薄抑亦忠義所關者重耳迨至壬
午變倍於前忠烈於昔乃樞臣煬蔽孤忠失卹國運
至此君子盖有不忍深問者 國朝定鼎 列聖紹
興功無不封庸無不賞更念忠義有關天地正氣爰勅
寰宇肇修祀事卽區區都昌祠旣構矣祭旣脩矣殉
難紳士亦旣蒸嘗百世矣 聖恩可謂覃敷而諸公
獨闕明禋豈時有顯晦廟食有遲速耶嗚乎君死社

殺臣死封疆其義一也李張諸公慷慨赴義祇事
負君國而祀事匪所思存無奈忠義相感緬懷憑吊
不能不爲之致憾愚祖壬午瀕阨於兵故所傳獨詳
愚茲復役志館脩述所聞撰爲此篇庶壬午故實不
至寢久盡爲淪亡且俟有力者覽之慨然爲命吏諸
公請祀馨宗以彰幽忠則愚文雖不敢云文獻之助
或亦有志表揚先哲者之參考云爾

贊

侯尹生祠贊

公諱鶴齡號松磐山西河津人調任觀城民建祠祀之

張士佐

邑博

令尹侯翁稟性剛中催科以恕讞獄惟公民邀撫字
士荷陶鎔百廢具舉四知追蹤有禱必應精誠上通
生祠設位以報戎功明德遠矣令名何窮

太史慈贊

并序

國朝 劉時中

邑人

昔孫子由贊孔文舉曰視公如龍視操如鬼夫豈故
爲軒輊蓋緣魯國一男子真人中龍耳與孔子贊李
老聃無異都昌太史慈未嘗謀面文舉及爲解難重
圍詎非古人所稱國士哉旣讀慈傳知爲母使銳意
奉命孝也而獨念黃巾猖獗縱橫北海雖擁重兵且

坐受困憇以卑騎出入數萬衆事一不濟恐玉石同
焚然卒往不惧者抑以北海相固嘗厚卹其母耳融
以義感憇以義報又何篤於義也當時漢昭烈以孔
融知天下有已爲喜其解融圍固宜然非憇詣平原
昭烈雖欲爲知己者用三千驍騎詎能自至故融圍
之解憇功不在昭烈下傳曰憇請援時祇隨兩騎攝
弓凡追者應弦倒相其射法幾匹飛將軍李廣然卽
以胆力論蓋亦烈矣哉向使太史子義從漢昭烈與
孔融同謀誅曹庸知不與武侯荊州比烈僅僅驅黃

中正孔子所謂牛刀小試耳有以夫人之宜識人也
假令孔文舉不具卓識善相天下人管亥之圖殆哉
殆哉慈儔寓都昌距今千有餘載余茲緬懷景慕爰
爲贊曰巍巍太史生於漢季善體親心卑騎赴義笑
圖而馳威奪賊幟噫嘻壯哉出人頭地

贊明壬午李張諸公

并序

周來邵 邑令

自古稱義師莫如周之武王夷齊猶非之曰虞夏沒
兮命衰安往夫亦各義其義耳昔人曰死或重於泰
山死或輕於鴻毛非死之難處死者難壬午李張諸

公可謂善處死矣余嘗讀明史觀僞闖犯太原時驍
中軍盛應時巡撫蔡見城不支策馬赴敵應時誓死
先已自殺妻子頃之一城官吏盡遇難義哉忠哉差
可與諸公後先爭烈比抵居庸關若降若竄迺若僞
死是獨何哉乃蝼蟻輩耳夫李張諸公授命壬午盛
蔡數公殉難甲申中距一載死義同揆館閣大書特
書獨錄盛蔡數公垂爲信史而李張諸公奄忽銷歇
一至於今豈孤忠運阨耶抑館閣失紀耶人耶天耶
壬午迄今百餘年耳芳躅遺燼沉淪湮沒幾盡過此

余欽其忠憫其晦

乃撰詞贊曰嗟乎諸公大義骨結天不祚明我師仗

鉞衆皆歸心公獨持節慷慨赴熱腔濺血仰瞻紫

微丹心不滅孤忠在天爭光日月

賦

弔逢萌賦

孫夢

邑人

陟西山以南望兮雲樹縱橫厥里曰北逢南逢兮誕

子慶乎篤生歸故里兮遺芳名廉頑起懦兮直繼乎

伯夷之清我生雖後兮鄉邑則同潛德宛其在目兮
與天地共無窮爰求其苗裔兮不可獲紛如其里之
人兮將上下而求索獨慚乎非予之壽兮應山靈之
笑我老冉冉其將至兮猶此志之不果吁嗟子慶奚
爲其遁兮余又奚取哉坐翠微以流盼兮固千載之
一哀相鳳凰之高翔兮時覽德而下之孔子之於顏
回兮亦曰行藏不違其時當西漢之季兮子恥爲人
役一擲楯而去兮值莽之篡逆痛三綱兮淪替倏解
冠而挂兮浮東海而長逝恥食其粟兮飄然無累民

到于今兮服子之義義聲兮一激群雄兮並爭誕光
武以帝室之胄兮一舉兮功成紛賢士之振袂而出
兮龍行雲從胡子之累徵不已而不起兮竟不能繪
雲臺以馳聲豈果如子之言兮年歲之旣耄抑以政
歸臺閣度大行之難兮故從其心之所好吁嗟中道
不可見兮孔子尙有取於廢中之權豈達人之輕軒
冕兮自前世而固然高鳳兮日遠撫余膺兮曠百代
而相感悲夫今之世兮益隘以周容偃規矩而背繩
墨兮競委曲以爲通余兮余兮踈且庸聊高卧于西

山兮以步乎夫子之蹤

芙蓉池賦

國朝

孫乾元

鄴水舊都芙蓉池荒渚蓋帝子之長洲而王孫之別墅
觀其北通渤海南挹浮塘淤河縈回而奔注瀑沙噴
飲而汪洋一碧萬頃水色天光地遠勝夫印渚味豈
侔乎濠梁則有甄城貴胄衡府名王扶輪承蓋選勝
擷芳起水榭構風亭曲房窅窅飛閣崢嶸橫波却月
左拂右縈檻倚長虹通湖心之一徑窻懸瀑布暗稻
隴之千町歷歷晴川鶯宛轉以歌樹萋萋芳浦漁欸

乃以揚舲，染房櫺之四面。天垂卵色，添雨水之半篙。
波蹙魚鱗，月踈而鏡彩。縠紋隱映，素幙風細而簾鉤。
簾網遙動，青蘋爾其朱光。方麗澤草爭妍，回塘滉漾。
長沼清漣，奇葩茁發。秀色天然，紅衣楚楚。翠蓋田田，
辭雕飾而彌工。擢淤泥而不染，試出水之新粧。呈臨
波之笑臉，婀娜舞態。扶綠漪以全低，飄渺噴香。颺清
風而更遠，巧披五色之圖。羞擬六郎之面，擎玉露之
團圓。落丹霞之片片，驚鷺翠兮交飛。睡鴛鴦兮燦爛，
龜成巢而文列。嫩葉方齊，魚吹浪而痕貝。似波微瀾，

花細尋來只姓慙
冶鉛華拭去越女含羞或交柯
並桁亦晨吐而暮收朝日方升霧歛千層之碧浪
夕陽返照光插十里之朱樓早霽則曉鏡初開
靨盈盈以乍洗微雨則明珠欲瀉淚
以將流依竊賞庾君之偉麗集裳吟楚客之離憂
及夫紅房墜粉白羽飄烟才看水旦旋放木蓮錦
城日耀花塢雲連分萬朶於長沙明粧艷服移孤
根於巴蜀秋水平川隔岸何灼灼映水更娟娟爾
乃倚桂柵蕩蘭艫披荇藻觸菱荷放中流兮采蓮
歌鳴簫鼓兮舞婆娑望美人兮

步凌波怨雙蕖兮恨若何醉碧筒兮朱顏酡然而清
漳墮雀泌水消魂春花兮寂寂秋草兮沉沉思公子
兮未敢言怨羅綺兮黃昏歌舞歸何處臺榭已成空
菰米沉雲黑蘚衣蝕砌紅年年惟有蘆花岸搖落西
風明月中

詩

青峯疑翠

党丕祿

邑令

望裏常期着屐行朝朝徒有羨山情昔聞風湧松濤
壯今見嵐描黛影紅片石常存仙字古顏祠半映路

苔清登臨最好消煩暑可奈浮名絆此生

前題

李應兆

邑人

青山笑兀白雲深煙色真真鎖翠林坐待晚風涼似
洗幾回移榻就松陰

前題

劉育杰

邑令

峻嶒海角一峯青遙望蕭蕭聳翠屏老檜耐寒留萬
古碧松最小越千齡羞將艷色爭天巧耻借春光炫
地靈尤羨山僧依石刹不嫌衿淡自清寧

前題

周來邵

邑令

百里縣志 卷八
十里田塍接翠微，奇峰聳秀對漁磯。
烟橫濃黛風前起，雲捲晴嵐雨後飛。
隔岼似屏連碧草，開簾如畫點青旂。
望中更愛豐登兆，野色山容綠總肥。

前題

陳之粉

邑人

一望青巒遠翠屏，奪目開晴光吐峭。
壁危蹬滑蒼苔黛，靄雲濃淡煙迷人。
去來登臨秋月下，胸境滌滌塵埃。

前題

周念岐

典史

郡城山色近蓬萊，列嶂東南積翠堆。
林雨初晴眉黛濕，嶺雲乍過畫屏開。
筠床獨對宜清曉，蠟屐登臨印

碧苔欲問數峯何處是遙瞻濰畔送青來

前題

魏璠教諭

何事看山久忘歸爲憐山色繞芳菲松濤斜映千重碧
草錦平鋪一片輝霧落仙碑浮黛墨煙侵濰水潤
苔衣遊來不用高人贈帶得翠嵐馬上飛

濰水環清

孫夢邑人

濰河蕩漾小舟橫水氣連雲暮色清百折茫茫遙入海
千年滾滾曲環城風來波蹙龍鱗細潮退沙澄鳥篆平
獨泛中流明月上此身真是一鷗輕

前題

党丕祿

邑令

安流秋淨影涵天
柳色深籠野渡船
不羨澄波飛白鷺
常防瀑漲下平田
西南秀發依山轉
東北瀾洄護邑旋
愧我無能猛虎渡
只留空碧印婵娟

前題

姜若侗

邑人

澰水泱泱遶縣還
波流清徹自箕山
土人猶識囊沙處
楚漢興亡指顧間

前題

劉育杰

邑令

一水縈紆繞郭清
烟光上下碧晶晶
雲過波面魚先

覺月滿池心鳥不驚浪疊九廻偏灝瀚勢經百折
輕盈縱多天外風塵染柰此冰壺澈底明

前題

周來邵 邑令

一水廻旋繞邑城臨流欲賦愛澄清春風浪煖千層
碧秋雨波深百折襟憶昔柳營紅蓼寂喜今蘆渚白
鷗鳴汪汪無盡同恩澤灌溉堪資惠我氓

前題

魏養本 邑人

才看山高又水長臨流豪興自徜徉漫言身世同泡
影雅有生平寄渺茫一道浮光連渤海兩行煙樹遶

都昌縱觀每憶千年事岸上啁啁是禹疆

西岩晨旭

李

鳳

邑人

剛風吹破曉山雲鴈唳晴空日始昕
霜染疎林紅的天涵野水碧云涵嵐
光墮地翻鴉影草色搖空絢
雉文今日山行饒趣味澗松籬菊正清芬

前題

孫夢

邑人

高卧西岩意自閒興來冒曉獨躋坂
一輪紅日初離海萬里晴光已滿山
樹色含烟清不了鶯啼傍戶樂
相關邱壑最真逢迎少誰復披雲共往還

前題次韻

党丕祿

邑令

晴開宿霧曉雲閒
徑曲幽岩自可攀
五色霞光驚出海
一爐煙火已輝山
奇溫下濟初移榻
紫氣東來欲滿關
一日清幽饒道意
莫教冗務促人還

前題

史如驄

邑人

扶桑日出影朦朧
遙望西岩曙色紅
洞口桃花添綺麗
恍如人在畫圖中

前題

劉育杰

邑令

巉巖突兀聳城西
勢壓諸峰面面低
目斷扶桑觀日

出神遊滄海接天齊輪旋靈曜尙殘月鏡發晨光未
曉雞愧我徒成霄漢夢不知何處問山蹊

前題

周來邵
邑令

旭映西岩景異哉品題獨愧句難裁光連海嶠金爲
鏡色射林巒錦作堆芳草露含晴日燦明霞烜趁小
風開有時向曉停車坐恍似函關紫氣來

前題

孫藩
邑人

參差羣影遶西坡爲愛晨華時一過岸草雲收濃露
遍晴林日上曙光和書藏古洞人何在雨濕荒邱麥

已多回望東城烟郭靜滿都人士弄絃歌

前題

陳祖實

邑人

山聳城西勢向東
欣迎春旭艷晴空
鶯催宿草嬌粧
翠日射露花笑吐紅
疑搆蜃樓香峽上
驚含詩意錦
霞中韶華荏苒莫
虛擲趁取晨光燭碧穹

東山晚照

克丕祿

邑令

孤城落照半沉西
返景煙凝色滿畦
片片殘霞隨鶯
遠層層影倚天低
村醪道卧歸人醉
牧笛聲催宿
鳥啼莫遣流連仍
再酌微雲山抹路將迷

前題

劉育杰

邑令

岩堯山勢峙萊東馳景西傾靄畫工片片斷霞飛雨
後重重亂彩襯林中金翻落照觀鴉臂酒點殘暉醉
玉叢休怪謝安原有癖風光是處敵花紅

前題

周來邨

邑令

重巒傍郭峙巖嵒好景偏宜夕照中半壁斜暉通遠
岫一林蒼翠夾烟叢雲歸巖壑橫晴靄影亂牛羊下
晚風牧唱數聲山色外群鴉裁碎落霞紅

前題

陳之楓

邑人

西去斜輪掛斗城依稀點綴晚山輕餘暉返影晴猶
麗峭壁貪暄笑似迎傍澗鉤籠思墮草穿林霞染欲
棲鶯遊人莫漫傷遲暮且有明珠耀後程

前題

魏養本 邑人

日色西沉夕照平函關紫氣返蓬瀛光凝麗閣濃中
淡景走寒壇晦裡明唱晚牧童喧繡陌棲林野鳥關
丹城樽殘句就風雲起濰水河邊壯有聲

游沼荷香

翟 瓚 邑人

子游陂外草菲微何事村莊晝掩扉地近滄溟天寂

昌邑縣志 卷八
寂水浮菡萏日暉暉風烟惟見山川在人物誰憐歲
月非轉憶茲歌聲漸杳幾回惆悵更忘歸

前題次韻

党丕祿

邑令

千古遺蹤日漸微游坡惟見幾柴扉絃歌陌上空吟
鳥菡萏池邊但落暉俎豆於今模範在詩書隔代舊
廬非長歌俯仰皆陳迹薄暮猶逢野老歸

前題

孫夢

邑人

偃也曾遊此地無千年縫掖重師模高踪卓爾三山
埠遺澤茫然一水區文學獨懷傳海岱精華誰復說

姑蘇荷花香散陂塘遠尚有清風似到吾

前題

翟次木 邑人

子游陂外草堂虛荷影參差滿綠陰風物依然時序

改土人猶憶昔賢書

前題

劉育杰 邑令

伯牛南去草盈坡書味仍留君子荷疊疊霞光鄰

笈團團香霧鎖絃歌文風萬古開吳楚化雨千秋潤

薜蘿愧我有心追往哲武城不識近如何

會外前題

邑令

曾於青史慕賢名，對此芙蕖無限情。
外直不阿差擬節，遠觀雖褻可方清。
愛蓮自愧承家學，敢諫徒傳識履聲。
遺澤祇餘香遶岫，却逢開落正良明。

前題

魏

璠

教諭

高賢逸事竟如何，間步維堤覓舊阿。
河上三封烟繚繚，池上一望草萋萋。
家山已惜吳爲沼，遺跡猶傳花滿坡。
請看芳馨流未遠，芙蓉郡裡起絃歌。

震臺月

翟

贊邑人

獨憶東萊守關西，舊有名黃金辭故舊。
暮夜見平生

臺聳雲霞近，祠虛燕雀鳴。樓遲涼月下，感慨有餘清。

前題

翟次木

邑人

尋常看月亦徘徊，不似今宵霽色開。應是楊公臨皓魄，千秋重會却金臺。

前題

史如遷

邑人

何處光風拂面來，相傳漢使夜登臺。沙洲月影萊山高，獻萬

年杯存心自問古今事，翹首關西念幾回。

前題

楊

吳

邑人

東萊太守楊伯起起家 農光青史十年官至二千
石五馬長驅天子使苞苴穢濁感二東何人意氣薄
長空天子常懷股肱郡蒼生久慕循良風昌陽道上
車馬吼晉接署中逢故友介嚴取與冰霜潔獨對神
明自不苟故人相逢話舊遊豈因金重識荊州金辭
人往千秋後留得荒臺土一邱當日四知心似永迄
今百代凜風紀一揮清夜等微塵四世三公從此始
異世風聞臭味真過臺不見臺上人月明北海形如
在願與先生共古今

前題

劉育太

風靜雲空霽色開
東萊舊有却金臺
冰輪乍湧香生桂
玉鏡初圓彩奪梅
人我誰能逃藻鑑
謾言夜暮無明鑒
月滿關西土一堆

前題

周來邵
邑令

作史今來凜四知
凭欄極目欲神馳
蟾光爭似初晴潔
清節能無暮夜私
終古冰心同皓魄
千秋黔首仰風姿
登臨想慕情難盡
遺愛空瞻羊祜碑

仙園異筆

党丕祿
邑令

一官匏繫笑忙忙，攬勝山蹤石阜陽。
詩就風霜驚句古，書彎霽月引鋒長。
王喬飛舄非無術，盧老還丹信有方。
自念有羞勾漏令，空遺酒債與詩狂。

前題

劉育杰

邑令

仙筆題園園亦仙，仙園仙去跡茫然。
空餘鸚鵡樓中鶴，誰識桃花洞裡天。
漠漠雲霞傳異蹟，淒淒風雨憶前賢。
蓬壺海外人何處，徒令村童話昔年。

前題

周來邵

邑令

蹟在名園異絕倫，雲烟飛舞脫凡塵。
不磨休羨方

舉入化如傳張旭神誰向石中求脉望應疑瓜穀有
龍賓留題欲使將軍悟房瑄當年是後身

前題

魏養本

邑人

勝園風物迥塵緣應是人間別一天鬱鬱怪松依翠
嶂璘璘古碣映晴川書傳白字瓜爲筆詩隱綠苔石
作箋遙指隴頭凝暮靄疑乘紫氣度飛仙

孫廟奇槐

党丕祿

邑令

奇枝夭矯駕雙龍應有神工造化通敍老曾沾秦漢
雨根深飽歷海天風當年事業驚諸國此日爐烟福

二東莫道屠龍皆幻說卽留一木尙竒雄

前題次韻

李肇林

邑人

千年竒樹叱雙龍鱗甲皴皴內自通
揀地似應連島嶼蟠空漫欲傲霜風
壯猷已邁先秦上祠廟還魏瀚
海東歲歲鄆人香火遠寧徒梁魏遜豪雄

前題

劉育杰

邑令

高榦扶疎越樣竒屠龍猶想舊兵師
一時韜畧傳青史千載風霜老碧枝
恍似長蛇交擊應愧同編柳漫
披離當時休怪憐才少留取英靈草木知

前題

周來邵

邑令

功成當日此分封，猶有雙槐覆蔭濃。
事業漫嗟蟻穴，夢枝柯直似宋宮龍。
雲屯古殿樨涼月，聲入長廊續暮鐘。
料是謀猷施未盡，靈依草木示奇踪。

前題

陳之楓

邑人

古樹何年留異蹤，森森露井儘槐封。
皮皴已與碑同篆，榦屈豈惟人似龍。
羽蓋排空蔭渤海，靈根盤地奠芙蓉。
深藏羞並群材植，獨據紫垣第四重。

前題

魏養本

邑人

廟貌巍然海色侵雙槐雄秀氣森森虬龍卧地蒼根
老蜿蜒蟠空碧蓋深七國已驚竒出業千秋猶見縱
橫心滄桑幾歷籌添屋惟有袍暉真到今

弔逢萌

唐汝璈

群司馬

黃虞世遐邈箕賴風熄滅中古待士賤豢驥雜群秣
緣茲榮利場沉酣侵人骨雲霄未致身青紫志先奪
蝸牛競升壁翻蟻鈍者拙喪已鮮色慙胡暇顧臣節
國勢丁離披團沙紛蕩折往事尋覆軌掩卷欲流血
北海有隱君清貞榮冰雪食貧非所厭獨耽效趨謁

擲楯不掉頭氣已偃溟渤遊學咀麟經大義皎日月
維時炎精晦龍戰重陰結姦雄巧簧鼓獻頌塞城闕
嗟嗟草子美新丐容悅天地失其宰三綱頽然絕
朗鑒燭危機介石不終日挂冠東都門片帆遼海濶
戴盎哭于市蹤跡詎爲謫中興晰運預占妖氛豁
真主御宸極綱羅盡英傑豈乏天孫章堪補袞職缺
素心甘隱淪入山轉秘密大勞連小勞茹芝還採蕨
葆光真性適熏德善良徹聲價震寰宇徵書星火發
託耄罔識塗堅卧老岩穴鴻鵠摩秋旻虎豹安可繼

意氣薄雲臺標榜侈勲烈識緯附霸圖伊誰稷與契
卷舒妙成筭應不愧明哲高風滌浮埃廉頑起懦劣
東漢尙節義清論懼纖鱗大厦雖垂顛支撐力猶竭
阿瞞恣睥睨至死且哽咽鼎沸國祚綿忠憤見耿切
世教邈扶培厥功疇云蔑千載臭味同遺像梓里揭
習俗方靡靡此意漸銷歇空谷喜足音勿漫疑孤潔

題四知祠

堯不祿

邑令

漢國山河盡冰操凜未休揮金輕五夜遺像重千秋
梁月留顏色簷霜寫素修高風不可滅一夢識荊州

又

勢址微茫地蒼然廟宇深高標人已去清白像遺今
汗簡光書史不交蹤夜金幾多臨拜者銷盡不才心

題關西夫子廟

劉育杰

邑令

蒼蒼山之松勁節傲寒冬誰堪此似者懷古想宏農
宏農有伯起萬石翁夫子秉性清回剛至今尚不死
某年守東萊便道過楊臺故人令昌邑登茲扶金來
挾金贈太守殷勤謝故交旁顧四無人何妨題別於
太守獨精純清室見天真誰知節義重現金身我處

天地本無私，而我孰可欺。金部不坐霜，冷夜深時。
夜冷天霜節，墨吏心猶寒。一念判正邪，芬芳餘幾何。
越今幾百載，浩氣仍如在。建祠兼立碑，遺愛留東海。
我來令海東，穆然仰高風。鳳高太守祠，碑久卧泥中。
殘缺成三四，徒見墨時狀。微點舊碑文，相塗不成字。
某某思修補，勿忍同石鼓。作詩志不忘，愧我詩不古。
關西有儀鳳，千秋一片情。吟成十二韻，枝上月三更。
四知堂
薛瑄

薛瑄

人間無處不天公，却笑黃金鑄夜中。千載四知臺下

過馬頭猶自起清風

四知臺

劉欲尹

邑人

舊踪荒茫草木深四知臺下動幽吟夜金當日能多
少博取芳名遍古今

四知臺

高嵩

縣丞

關西正氣滿東萊古蹟仍餘土一坏皓月年年明午
夜清風歲歲起高臺斷碑殘闕留紅淚荒礎殘清館
綠苔莫怪遺基多枳棘而今還恐古人來

四知臺

陳之楓

邑人

昌邑縣志 卷八
傍城小築傲層岑
一登臨萬古心
應使人間無黑
夜何曾眼底有黃金
宦囊洗拂秋天淨
月色晴鑲道
氣深繚繞清風臺
下起透人面袖到如今

遇仙園次劉長生韻

于作霖

邑人

歷歷仙踪望眼中
殘碑曾伴昔時松
塵沙半掩新秋月
巒黛還描舊曉峯
爲念詩成應泣鬼
旋驚筆落憶生風
古人勾漏期爲令
惆悵山河意不窮

遇仙園

陳祖實

邑人

舌園半畝將軍地
疑接仙人海上山
丁鶴欲飄荒園

夢隨龍不通埜塘顏徑穿羽屐色凝碧草拂颺輪性
愛閒三素雲歸何處岫碑中蝌蚪自斑斕

梳洗樓

于始瞻邑人

風雨何年對曉妝間雲淡月古臺荒花紅野渚
黯黯冷草綠晴洲翠帶長黃土無情埋粉黛朱樓有恨鎖
衣裳維波日夜東流去寒雁淒迷下數行

荒阡斜日冷孤州此地猶傳梳洗樓眉黛綠沉汀柳
暈口脂紅褪渚蓮愁雨飄古瓦傾珠箔雲散亭臯見

土邱一自美人成夢幻妝臺零落幾千秋

梳洗臺

陳之楓

邑人

可堪骨月兩參商小立層堆眺故鄉髮挽碧空雲出
新面迎春曉露流香岸沙已障歸寧路野卉猶添嬌
粧臺上幾番梳洗罷密都依舊隱蒼茫

謁崇聖寺

陳

文

邑令

芙蓉舊說多風景梵刹流傳亦有年海島通靈千派
遶沙門列嶂萬峯連可憐棟宇非前代尚有頭陀結
宿緣秋老風高遊子去何人再爲念西天

謁王母宮

翟瓚

提兵當日過涼州百二山河寄壯遊
王母宮前坐雨
雪漢皇祠後自春秋天臨朔漠崆峒迥
路遶終南涇
渭流棟宇巉巖青鳥至瑤池擬在海西頭

孫子廟

高嵩
縣丞

孫廟蒼蒼靄暮烟令人遙思漢唐先
蕭森松栢朱門
外層疊山川碧檻前七國奇功五萬竈
一生神策十
三篇英靈海外今何在俎豆猶然到玉筵

題西岩

霍瓚
邑人

世外風流愛小山
結廬高著翠微間
天台佳氣春常在
閬苑浮雲晝自閒
檻外松烟偏靄靄
枝頭鳥語故關關
明朝柱史朝楓陛
野老思君何日還

石白山

陳之楓
邑人

曾從石臼一經過
環白芊芊覆綠莎
藥滓漉淋埋水曲
杵聲斷續響山阿
常言浮世影皆幻
未必長生訣盡訛
寄語仙姑春歇後
肯留餘粒慰蹉蛇

遊峽山

孫夢

邑人

山頭幾度杖藜行
異境天開畫不成
地勢長離分

去雨飛煙岫看雲生踈林半掩仙祠秀怪石橫堆古
洞清踏破薜蘿凌絕頂岩花含笑自相迎

卧虎山

魏養本

邑人

卧虎何巖嵒瑤樞吐氣雄石穿留漢鏃玉立憶秦宮
月暈千巖影松生萬壑風老僧卓錫在應自喚空空

紅崖渡

孫爾周

邑人

夾岸霜楓一色秋紅崖古渡喚漁舟人煙直斷桃花
寺野草平沉梳洗樓不盡天風吹遠浦無邊落葉下
中流停橈欲問龍且事暮靄寒飛兩岸浮

游陂

陳祖實

邑人

何日高賢滯此鄉
艷傳別野煥池塘
魚噴水浪連書
潤風捲蓮心夾墨香
曾尙絃歌敦魯邑
還留文學淑
鄆陽蹟湮奕世名
難滅蔓草荒煙自久長

澰決有感

李肇林

邑人

我生良非地澰河居上潯
漂溺如有待食息
視蜉蝣
蔽業苦難移
年年慮在秋
胡爲五月中
霖雨肆虔禬
二麥半場野耳生
滿穗頭鋤禾草不死
蔓引一何稠
千錢傭一土
難供無厭求
棄之惜前勞
弗棄力不賄

艱苦萬不辭將來冀有收誰堪河伯怒驅浪若奔
隄散黃濤影湍漩綠草溝登城望我私茫茫付一流
徒存砥柱樹僅見渙中邱居民乘危聚爲巢讓拙鳩
丁男多水立未耳餘木浮妻子席擎雨不殊麤與麀
連屋成漂沫巖城寄泛漚勢闊人民恐聲吹鬼神愁
陰氣籠餘漲風濤怒未休對衆長太息悲語共啾啾
縱然全性命饑寒誰代謀常恐雪霜至委作溝中騷

灘漲

陳之枌 邑人

灘水來琅邪齧我青石足怒波挾秋濤樹杪飛白玉

以暮爭海嶠浪滾雲天綠古岸碧煙起物物受慘酷
蒼茫晚渡愁不辨小溪曲

冠警城守

辛丑十月樓霞于七作

党丕祿

邑令

相逢樽酒話連牀
坐卧城頭待漏央
慚說胸中兵擬
范欣傳闔外技穿楊
遊魂今已危朝露
刁斗還須警
夜霜自是聖明能
戡亂肯教赤子日
奔忙

辭金臺

陳祖實

邑人

氣爽天晴別有春
辭金臺上草萋萋
野花盡解楊公

意擬立東風不着塵

桃埠

魏養本

邑人

十里晴堤簇綵霞
春風紅雨落桃花
漁郎莫問武陵
路別是仙源第一家

鈴鐺溝

陳祖實

邑人

生就石鈴一竅通
人工從不敵天工
音似霓裳
曲又被浪吹別調中

題齊烈婦墓碑

劉元才

邑人


欽哉年少女一死植綱常
貞烈千秋永姓名萬古香

縈瘼番女史血淚入湘篁聞夢西山賦詩欲斷腸

壬午殉難紳士入祠

陳之楓 邑人

書生換甲汎城頭危卵猶望旦夕留力竭未能完趙
璧恩褒却許伏吳鉤只知大義生難昧常揭忠魂死
未休一日承嘗千古事香烟靄靄歷春秋



一曰...
...
...

...
...
...

...
...
...

王平...
...

...
...

...
...
...

